



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

△

GUILIELMI HEWSONI

DISQUISITIO EXPERIMENTALIS

DE

SANGUINIS NATURA,

VARIISQUE EJUS PER MORBOS
MUTATIONIBUS.

Ex Anglico Latine vertit, et Præfatione
additisque nonnullis observationi-
bus illustravit


JACOBUS THIENSIUS VAN DE WYNPER SSE,

MED. DOCT.

AZ 1562 2

LUGDUNI BATAVORUM,
Apud ABRAHAMUM et JANUM HONKOOP.
M D C C L X X V.

Vere scire est per causas scire.



BACO.

S.-S.



JOANNI PRINGLIO

S.


Domine! hunc Tractatum Tibi
dedicare, non adeo merita tua con-
decorandi, quam amicitiam tuam
celebrandi caussa, fustinui. Glo-
riæ tuæ, eximias tuas dotes di-
vulgando, addere nil valeo: Tu
vero meam famam, meos etiam
errores detegendo, insigniter au-
ge-



gere potes. Hoc me honore ma-
ctasti, ut hunc approbaveris Tra-
ctatum; quem magna ex parte
tuæ scientiæ et amicitiae deberi,
gloriosior: hæ etenim illud effece-
runt, ut mihi utilia plurima mo-
nita eruditasque suppeditaveris
cenfuras; quæ illum attentione
digniores reddiderunt, mihi que
opportunitatem præbent publice
profitendi, me esse in omnem vi-
tam Tibi summopere devinctum,

GUILLIELMUM HEWSONUM.

EDI-



EDITORIS

P R Æ F A T I O.

Illa, sicut cæterarum artium et disciplinarum, ita Medicinæ imprimis fors est, ut nova a nonnullis avide arripiantur; a plurimis, etsi luculentissime evicta, per-

VI EDITORIS

tinaciter rejiciantur; a paucis per experimenta observationesque fideliter examinentur. Quid itaque mirum, si sententia, ab HEWSONO hoc in libello prolata, raros offensura sit fautores, plurimos vero obtréctatores! Eximius tamen hiccé Auctor, veritatis affecla, in egregiorum Virorum, (quibus BOERHAVIUM, SWIETENIUM, GAUBIUM, SCHWENCKIUM, etc.; qui scriptis de sanguine et inflammatione, pro tempore eximiis, de Re Medica bene meriti, ulterioribus observationibus viam munierunt; annumerare licet,) verba neutiquam jurandum censuit, eorumque asserta novis experimentis corroborare vel destruere decrevit. Dicti enim Auctores, licet de hoc argumento multa bona protulerint, quosdam tamen errores, malis hypothesibus præjudiciisque fundatos, nondum expunxerunt;

P R Æ F A T I O. vii

runt ; sed nepotibus hoc caput ulterius elaborandum reliquerunt. Testetur inflammationis , quam tradiderunt , theoria. Testetur sanguinis , quam in illa peccare censuerunt , spissitudo ; testentur alia huc spectantia. Testentur denique ridiculæ de globulis sanguinis rubris ; de Lienis usu , &c. , (ne plura memorem ,) a veteribus prolatae opiniones. Rem autem fidelibus suis experimentis observationibusque , hoc in tractatu obviis , eo perduxit immortalis **GUILLIELMUS HEWSONUS** , ut in phlogistico sanguinis statu non spissitudinem , sed contra tenuitatem excedere evicerit. Alio in tractatu communes de globulis rubris opiniones , utpote a veritate alienas , rejicere annisus est ; ut postea patebit.

VIII EDITORIS

Utrumque dictum tractatum; postquam ejusdem Auctoris *Descriptionem Systematis Lymphatici* Latine verteram, eamque eximia præfatione *de Lympha et Lymphaticis* ornaverat clar. JOANNES DAVID HAHNIUS, (quæ ante biennium prodiit;) in eandem linguam ut verterem, auctores fuerunt clar. GUALTHERUS VAN DOEVEREN et modo dictus HAHNIUS, Præceptores æstumatissimi; quorum in me benevolentiam et merita nunquam non gratus agnoscam, quorumque jacturam respublica litteraria ægerrime fert, et, ceu vulnus cicatrice nunquam obducendum, dolet Pallas Batava. Alii Viri clarissimi idem commendarunt. Postquam vero summo-pere lugendum dictorum clar. Virorum fatum intervenerat; opus hoc facile deseruisssem, nisi, Academiæ Gelricæ decus, clar. RUDOLPHUS FORSTENIUS animum denuo,

P R Æ F A T I O. x

nuo , oblata etiam utriusque libelli
recognoscendi opera, excitasset. Repe-
tendis quoque, aut noviter instituendis
ad hoc negotium experimentis interesse ,
et in animalium Anatomie opem ferre
haud denegarunt doct. WILHELMUS XA-
VERIUS JANSEN et PETRUS VAN KESSEL,
Med. Cand., amici æstumatissimi.

Horum itaque auxilio, B. L., hæc etiam
operum Hewsonianorum pars Latine versa
prodit; nec versa tantum, sed et alio-
rum propriisque observationibus (*) il-
lustrata. Egregia, quæ continet, experi-
menta et observationes, tum ab aliis,
tum

(*) *Has, typis cursivis, (ut ajunt,) satis distinctas, et
litteris alphabeticis insuper ad marginem notatas, ab
animadversionibus, ab Auctore ad proprium textum adje-
ctis, facile discernet B. L.*

* EDITORIS

tum a me ipso, ut porro patebit, fuerunt confirmata. (*)

Hoc autem tractatu prelo commisso, mihi occurrit expert. **GUILIELMI HEY** tractatus; (†) cujus argumentum, quum dictis multum repugnet, silentio penitus sup-

(*) *Utiliter cum hisce conferri poterunt, licet non omnes eis assentiantur, T. SCHWENCKII Hæmatologia. J. B. GABER verhand. over de Verrotting der dierlyke vogten in Natuurkund. verhand. III Deel, pag. 274, seqq. J. GREGORY Conspectus Medicinæ Theoreticæ. Edit. alt. J. HENDY Essay on Glandular secretion. G. HAMILTON Dissert. de Sanguine Humano. J. C. BAERTS Disquisitio de Natura Sanguinis Inflammatoril, imprimis de Crusta Phlogistica et Spissitudine, quæ vocatur, Inflammatoria. Conf. imprimis doct. H. D. REIMARI Dissertatio, animadversiones quasdam de Opii, præcipue in febribus, usu, exhibens, pag. 5. Not. (k).*

(†) *Observations on the Blood. Lond. 1779.*

P R Æ F A T I O. xi

suppressere, ne benevolum Lectorem
 Hewsonianæ sententiæ audacter adstrin-
 xisse videar, piaculum duxi. Dicto in tra-
 ctatu, ut paucis rem complectar, statuit
 Auctor, superficiem perluculentem, in san-
 guine phlogistico mox post V. S. obser-
 vatam, ut et crustam phlogisticam, maxi-
 mam partem sero constare, et lympham
 esse sero dilutam: apparentem sanguinis
 phlogistici tenuitatem sero imprimis de-
 beri: inflammationem sanguinem non at-
 tenuare; sed sub ea lymphæ coagulabi-
 lis proportionem auctam, hincque cras-
 samentum firmitus esse tenaciusque: immi-
 nutam vaforum actionem coagulationem
 sanguinis non accelerare; et experimenta,
 a se in sanguine animalium jugulorum,
 variis vasis recepto, instituta, eventum il-
 li, quem notavit HEWSONUS, contrarium
 plane habuisse: sanguinis, eodem in mor-
bo

XII EDITORIS

bo vario tempore educti, differentiam diversæ feri proportioni probabiliter deberi: et tandem variarum sanguinis, una eademque V. S. educti, portionum differentiam non mutatæ vasorum actioni; sed alii cuidam causæ, v. c. diversæ feri proportioni, diversæ fluentis sanguinis velocitati, diversæ receptaculorum diametro, diverso frigoris calorisve, quibus exponuntur, gradui, diversæ receptaculorum materiæ, &c. deberi. Experimenta autem hujus Viri, animo ab omni præjudicio alieno, inter se, et cum observationibus Hewsonianis, ab aliis et demum a me ipso iteratis et confirmatis, conferat B. L.; nec illis contra summi Auctoris observationes facile subscripturus videtur.

Quo vero egregius hicce HEWSONI tracta-

cta-

status magis arrideat, scopoque satisfaciat, pauca de Sanguinis Natura variisque ejus partibus, tum ex Auctoris nostri, tum ex aliorum observationibus contracta, præfari liceat. Sanguis scilicet, fluidum est; quod per cor et vasa circulatur, sive non vitale, sive potius vera vitalitate præditum (*); e quo va-

rii

(*) *Vitalitatem sanguinis imprimis adstruxit clar. J. HUNTERUS variis argumentis. Vid. doct. REIMARUS l. 2. imprimis doct. HENDY Tract. cit. Sect. II. Cap. 3; qui illa refutare annisus fuit. Utraque sane pars sua habet argumenta, non omni plane veritatis specie orbata. Certe irritabilitas et sensilitas duo modi sunt, quibus se prodit vis vitalis in solidis; quæ tanto certe gradu in fluidis non observantur. Latiori autem sensu sanguinis vitalitas non plane denegari posse videtur: tum quia vitalitas nullis corporis animalis fluidis, modo excrementitia non sint, denegari potest. Conf. F. B. ALBINUS de Natura Hominis §. 51.; tum quia lymphæ sanguinis toti corpori nutriendo dicata est, partes vere*

IV . E D I T O R I S

rii humores, tum excrementitii, tum corpori utiles, sive mera separatione, siue vera mutatione, (*) vasorum imprimis actione, (†) secernuntur. Illum constare sero, lymphâ coagulabili et particulis rubris, (quæ male globuli dicuntur); (§) quibus et pars volatilis annumerari debet: (**). ipsas porro particulas rubras non sphaericas esse, sed planas solidasque, singulas constantes vesicula plana, rubra, solida, particulam exilem centralem, fo-

vitales inde formantur totumque corporis incrementum dependet. Ne alia proferam argumenta.

(*) *Conf. HENDY l. c. Sect. I. Cap. 3. et GREGORY l. c. §. 684, seqq.*

(†) *Vid. HENDY Sect. III. Conf. GREGORY l. c. §. 699, 703.*

(§) *Vid. infra pag. 1, 2, 6.*

(**) *Vid. infra pag. 2, not. (a)*

solidam, austerius rubram continenti;
 quæ a Systemate Lymphatico ejusque ap-
 pendicibus, Glandulis Lymphaticis, Thy-
 mo et Liene, formantur; (*) docet ob-
 servatio.

Cæterum, quo minus, hunc, ut et alte-
 rum jam dictum, tractatum Latine verten-
 do, a genuino Auctoris sensu deflecte-
 rem; irrepperunt nonnulla, castas purio-
 rem Latinitatem colentium aures facile
 offensura: quæ evitare nullatenus potui;
 vulgari sermone Auctoris mentem affe-
 qui, quam elegantiore stylo et placendi
 desiderio res maximi momenti, his libel-
 lis contentas, temere corrumpere, ma-
 lens. Hisce perpensis, nova molesti
 laboris specimina, B. L., eadem, qua
 ejus-

(*) *Conf. G. Hewsoni Opus posthumum.*

XVI EDITORIS PRÆFATIO.

eiusdem Auctoris Descriptionem Syſtematis Lymphatici, antea a me Latine editam, proclivitate accipias, et ſequentia ſphalmata corrigas, officioſe rogo.

Pag. 4 lin. 9 leg. 67. p. 6 l. 12 leg. conſtat. p. 17 l. 5 leg. neutrius. p. 34 l. 10 leg. lympham canis ſani. p. 42 l. 18 leg. ſanguis. p. 51 l. 9 leg. 26, ſeqq. p. 52 l. 8 leg. ſanguis in corde. p. 60 l. 17 leg. attamen. p. 62 l. 2 leg. novem circiter. l. 15 mox del. p. 63 l. 11 leg. ultimis. p. 73 l. ult leg. in nonnullis. p. 87 l. 5 leg. diffunderet. p. 107 l. 8 leg. refrigeratus. p. 125 l. 11 leg. videbantur. p. 141 l. 9 leg. evaporatum.

PRÆ-



P R Æ F A T I O

A U C T O R I S.

Fabricæ humanæ cognitio, sanitatis conservatio, morborumque cura tam momentosæ sunt humano generi; ut nullus dubitet hujus tentaminis Auctor, quin cuncta

**

eas



eas promovendi conamina, quamlibet tenuia, publice propenso animo sint recipienda. Disquisitio de Natura Sanguinis singulari attentione digna existimanda videtur; siquidem nulla est corporis humani pars, qua plura ratiocinia physiologica nituntur; nec ulla, unde plures de morborum cura conclusiones eliciuntur. Quumque disquisitio facta sit per experimenta in sanguine proximo, quantum fieri potest, ad illum statum, quo in vasis circulatur, accedente, fore ut inde elicite conclusiones testimonialia candidi examinis futurae et
ad



ad ultiores observationes et tentamina ducturæ sint, spes est.

Post divulgatam priorem editionem, nova nonnulla experimenta fuerunt facta, novumque caput additum; quod præcipuarum observationum conclusionumque, quæ hoc in tractatu occurrunt, anacephalæosin continet. Hæc additamenta inter pag. 106 et 145 occurrunt.

Appendix vindicias juris Auctoris in detectum Systema Lymphaticum, contra clar. ALEXAN-



**DRI MONROI, Professoris Edin-
burgensis, asserta, continet. (*)**

(*) *Hanc appendicem, tum quia huc proprie non spe-
dat, tum quia eristica, qualia continet, scripta libro-
rum sumtus nimium et infacunde augere solent, indu-
bus præsertim clar. HAHNII auctoritate, Latine vertere
non congruum duxi.*



ELEN-



E L E N C H U S.

Sanguis, vena eductus, primum cogitur; dein in crassamentum serumque separatur, *pag.*

1. — Coagulatio etiam in calore animali obtinet, 3, *seqq.* — ut et separatio, 5. — Crassamentum lymphæ coagulabili globulisque rubris constat, 6. — Lymphæ coagulabilis et serum quomodo differant? 6, *seq.* — Vividus color in crassamenti superficie quomodo explicetur? 7, *seqq.* — Sanguis arteriosus colore a venoso differt, 9, *seqq.* — Ubi hæc diversitas adsit, ubi verò absit? 11. — Salium neutrorum in colorem sanguinis efficacia, 12. — Eorum facultas coagulationem impediendi quomodo exponatur? 12, *seqq.* — Sal communis cur tanta copia in sanguine, ad usus culinares præparando, adhibeatur? 17. —



Varia lymphæ coagulabilis morboſa phænomena, 17, *ſeq.* — Cuinam cauſſæ lymphæ extra corpus coagulatio debeatur? 19, *ſeqq.* — Non debetur quieti, 20, *ſeq.* — nec frigori, 21, *ſeqq.* — ſed aëri, 23, *ſeqq.* — Quiete in venis tarde cogitur, 25. — Experimenta, quæ hoc probant, 25, *ſeqq.* — Vario tempore in variis corporibus et variis in morbis cogitur, 29. — Quomodo lymphæ ſaccos aneurysmatum repleat? 29, *ſeq.* — Quomodo extrema arteriarum poſt amputationem obturet? 30. — Quomodo molas, ſive conceptiones ſpurias, formet? 31. — Sanguis congelatus et regelatus, abſque eo ut coactus fuerit, 31, *ſeq.* — Quoq; caloris gradu lymphæ coagulabilis fixetur? 32, *ſeqq.* — Serum quo gradu cogatur? 36, *ſeq.* — Cruſta phlogiſtica ſive corium non a ſero, ſed a lymphæ coagulabili formatur, 39, *ſeqq.* — Inflammatio ſanguinis in coagulationem niſum non auget, ſed eundem minuit, 44, *ſeqq.* — Quomodo ſanguis in cordibus animalium mortuorum coagu-



guletur? 50, *seq.* — Inflammatio sanguinem non inspissat, sed attenuat, 51, *seq.* — Serum inflammatione non sensibilibiter attenuatur, 53. — Gravitas globulorum rubrorum specifica non sensibilibiter augetur, 54. — Lympha coagulabilis inflammatione adeo attenuatur, ut serum diluat, 55. — Quomodo crusta phlogistica sive corium formetur? 55, *seq.* — Non certum est inflammationis indicium, 57, *seq.* — Corium in primo vase, non in ultimo apparens, 59, *seqq.* — Hoc exponitur ex eo, quod lymphæ qualitates, intra ipsum etiam sanguinis missionis tempus, mutatæ sint, 63, *seq.* — Tempus, quo sanguis cogitur in primo vasculo, collatum cum eo, quo in ultimo cogitur, indicium mutationis corpori venæ sectione inducæ, 65. et 74, *seq.* — Corium partiale quomodo exponatur? 65, *seq.* — Quo tempore sanguis hominis sani, aëri expositus, cogatur? 46, 66. — Ejus ad coagulationem proclivitas debilitando corpus augetur, 66, *seqq.* —



Quomodo hæmorrhagiæ sistantur? 70, *seqq.* — Hinc animi deliquio, eas comitanti, non occurrendum, *ibid.* — Quomodo subitæ evacuationes ad hæmorrhagias sistendas suum conferant? 72, *seq.* et 135, *seq.* — Suspicio, corium nonnunquam a solo temporario roboris exercitio nasci, 73, *seq.* — Quomodo explicetur, quod crassamentum faccum formet? 76, *seq.* — Exemplum sanguinis tardissime coacti, 78. — Frigus sanguinis ad coagulationem proclivitatem minuere, unde constet? 78, *seqq.* — Coagulationem plane impedit, 83, *seq.* — Unde fiat, ut sanguis in animalibus frigidis, quæ per hyemem dormiunt, non cogatur? 84. — Exemplum subitarum mutationum in coagulatione sanguinis productarum, 87, *seqq.* — Nova documenta, lymphæ ad coagulationem proclivitatem, ubi corium apparet, imminutam esse, 90 — coriumque a forti vasorum actione produci et illa debilitando tolli, 91. — Corii in primo ultimoque, non vero in altero tertiove vasculo, præsentia quomodo exponatur? 91, *seq.* —

Co-



Corium pro varia vi, qua vasa agunt, præfens vel absens, 92. — Solum corium non certum requisitæ venæ sectionis est indicium, 93. — Animi deliquii et languoris subitanea in inspissando sanguine ejusque ad coagulandum diathesi minuenda efficacia, 94, *seqq.* — Quomodo igitur in hæmorrhagiis promovenda sint? 95, *seqq.* — Lymphæ ad coagulationem proclivitas subinde minuitur, absque eo ut attenuetur, 98, *seqq.* — Corii varia variis in casibus densitas quomodo explicetur? 101, *seq.* — Unde fiat, ut crassamenti basis adeo mollis sit, ubi sanguis denso corio obductus est? 102. — Sanguinis missio ad solitam quantitatem corpus non semper debilitat, nec sanguinis qualitates mutat, 102, *seqq.* — Exile officium non convenit, ubi debilitas sanguinis missione subito producenda est, 105. — Unde fiat, ut sanguis, qui juxta brachium stillat, aliquando crusta careat, etiam in morbis inflammatoriis? 105, *seq.* — Defectus corii in sanguine, qui juxta brachium stilla-



vit, non inde derivandus, quod aëri magis
 expositus magisve refrigeratus fuerit, 107,
seqq. — Cur sanguis, in tabulam guttatim
 demissus, serius cogatur, quam qui vasculo appo-
 sito contineatur? 113, *seq.* — Diverſa ſan-
 guinis forma in diverſis vasculis nulli orificii
 venoſi mutationi debetur, 116. — Brachii li-
 gatura diu continuata parvam corii quantita-
 tem producere poteſt, 117, *seqq.* — Exem-
 pla ſanguinis non coacti, ubi aëri expoſitus
 fuit, 123, *seq.* — Unde fiat, ut ſanguis in tu-
 moribus ſubinde non cogatur? 124, *seq.* —
 Præcipuarum obſervationum, hoc in Tractatu
 memoratarum, anacephalæoſis, 126, *seqq.* —
 Corium inflammationis non cauſſa eſt, ſed ef-
 fectus, 130. — Seri natura, 138. — Qui-
 bus conſtet? 139. — Quomodo a lymphæ
 coagulabili differat? *ibid.* — Seroſitas quid
 ſit? 140. — Mucilago ſeri inſpiſſari iterum-
 que ſolvi poteſt, citra coagulationem, 141. —
 Hac proprietate convenit cum albumine ovi;
 ſed a lymphæ coagulabili differt, 141, *seq.* —

Se-

Serum, aqua dilutum, insigniter mutatur et ad lactis indolem accedit, 142, *seq.* — Serum, æque ac lac, per coagulum cogitur, 143. — Serum sanguinis non semper perlucet, sed nonnunquam colore serum lactis refert; subinde cremorem superficiei innatantem habet, et subinde, lactis instar, album est, 145. — Non nisi in his casibus globulos continet, et cujus generis? 145, *seq.* — Exempla seri, lac referentis, ab Auctoribus notata, 146. — Casus nuper communicati, 147, *seqq.* — Hoc phænomenon chylo haud assimilato non debetur, 151. — sed pinguedini resorptæ, 153. — Pinguedinis resorptio, ejusque in vasis sanguiferis accumulatio, pro causa plethoræ habita, 153. — Chylus avium non albet, 154. — Pinguedo nova est substantia, in membrana cellulari formata, nec mera partis nutrimenti oleosæ depositio, *ibid.* — Cur superfluum alimentum in pinguedinem vertatur? *ibid.* — Axungia omnium maxime nutrit, 154, *seq.* — Seri albor insolitæ pinguedinis resorptioni debet.



betur; quæ deficientis appetitus, &c. causa
est, non autem effectus, 155, *seqq.* — Cur
albus feri color in nonnullis morbis atten-
dus? 158.



DISQUISITIO EXPERIMENTALIS
DE
NATURA SANGUINIS.

C A P U T I.

*De Seri separatione ; Craffamenti colore ; et
cauffis* COAGULATIONIS SANGUINIS.

Ubi sanguis, recenter e vena ductus et pelvi
exceptus, quieti traditur, paucorum minutorum
spatio coagulatur, et paullo post in duas partes
separatur, nominibus *Craffamenti* et *Seri* di-

A

stin-

stinctas. (a) Duæ hæ partes pro diverso corporis habitu proportionē differunt. In homine robusto crassamentum majori proportionē adest respectu feri, quam in debili; eademque diversitas in morbis obtinet. Hinc conclusio generalis elicitur, quo minor sit feri ad crassamentum quantitas, eo magis venæ sectionem, liquores diluentes et tenuem diætā requiri; dum in nonnullis hydropicis aliisque morbis, in quibus serum magna, crassamentum vero parva quantitate adest, venæ sectio et diluentia summopere nocerent. Dum itaque utile videbatur attendere ad proportionem harum partium in variis morbis, indicationesque curatorias inde formare; illi, qui in sanguine

(b) *Hæc nempe sanguinis separatio fit, ubi pars sanguinis volatilis vaporis forma evanuit; de qua conf. ALBINUS de Nat. Hom. §. 197, GAUBIUS in Inst. Pathol. Med. §. 335, GREGORY Confp. Med. Theor. Part. I. §. 489: edit. alt. Quæ certe pars, ab Auctore hic non memorata, cum reliquis nequaquam confundenda videtur.*

ne experimenta instituerunt, determinare conati sunt, unde perfectior hujus separatio in binas has partes depeñdeat; siquidem constat, nisi hoc factum fuerit, nostras conclusiones insignibus fallaciis fore obnoxias. Duo ex recentioribus Auctoribus in eo conveniunt, quod, si sanguis vena eductus loco frigido reponatur, non facile separetur, et moderatus calor requiratur: hoc quotidiano usu constat. Dicunt pariter, calorem requiri animali calore, sive 98 gr. thermometri Fahrenheitiani minorem; et, si recens sanguis vase recipiatur, et hoc vas immittatur aquæ, calorem 98 gr. æquanti, eum non in partes separatum, ne vel coactum iri: hoc vero falsum esse, mihi per experimenta constat.

EXPERIMENTUM I.

Vas stanneum, aquam continens, lampadi fuit impositum, quæ aquam inter 100 et 105

A 2

gr.

gr. caloris mediam retinebat. Huic aquæ immiffa fuit phiala, continens fanguinem fani hominis brachio vix eductum : phiala ante fuit calefacta, dein repleta et obturata, ut excluderetur aër. Eidem aquæ immiffum fuit vafculum fanguine, ex eodem homine venæ fectione educto, femiplenum; tertia porro fanguinis portio ex eadem vena pelvi fuit recepta, menfæque impofita, calore atmofphæræ 67 gr. æquante. Jam, ex illorum opinione, priores portiones neque coagulatae, neque feperatae fuiffent, quum portio pelvi contenta feperari inciperet; fed contra, fingulae portiones eodem ferme tempore cogi funt deprehenfæ; quique intra aquam calidam continebatur, fanguis non tantum æque cito, ac reliquus, fed etiam citius, fuit feperatus. (b)

EX

(b) *Idem experimentum, præfentibus Amicis, inftitui in fanguine vivi canis vena faphæna educto; ea cum differentia, ut atmofphæra calor 41, calor aquæ 100 gr. æquaret; et dein fingulas portiones æquali ferme temporis, duorum nempe minutorum, fpatio coactas fuiffe, vidimus.*

E X P E R I M E N T U M II.

Idem experimentum repetitum fuit in sanguine hominis rheumatismo acuto laborantis, dum calor atmosphæræ 55 gr. non superabat, et aqua calida 108 gr. æquabat; et eventus experimenti non tantum confirmavit id, quod in præcedenti fuerat observatum, sed etiam ostendit, hunc caloris gradum diathesin ad coagulationem non tantum non minuisse, sed vel auxisse: sanguis etenim, vasculo & phiala contentus, non tantum coactus fuit, sed et separatio multum progressa, antequam omnis sanguis pelvi contentus coactus fuit. Hinc conclusi, separationem sanguinis, dato tempore, eo majorem esse, quo calor, in quo ponitur, ad calorem animale, five 98 gr., propius accedit; five majorem in hoc calore, quam in ullo minori. Et hac in conclusione me confirmarunt experimenta infra memoranda, quibus sanguis in vivo animali, dum quiescit, et coagulari, et separari deprehensus fuit.

Notum quidem est, crassamentum duabus constare partibus; quarum altera ei soliditatem conciliat, & nonnullis *pars sanguinis fibrosa* dicitur, sive *gluten*, sed aliis magis proprie *lymphæ coagulabilis* audit; altera rubrum colorem sanguini conciliat, atque *rubrorum globulorum* nomine venit. (c) Duæ hæ partes separari possunt, crassamentum aqua abluendo rubrasque particulas aqua solvendo, dum *lymphæ coagulabilis* solida remanet. Hanc lympham sanguinis coagulabilem, ubi solida reddita est, crassamento firmitatem conciliare, constat, si sanguis recens baculo agitetur, ita ut hæc substantia baculo colligatur; in quo casu reliqua sanguinis pars fluida manet. (*)

Cras-

(c) *Conf. clar. GAUBIUS l. c. §. 339. seqq. GREGORY l. c. §. 490. seqq.*

(*) Hic conducit memorare, antea coagulabilem sanguinis lympham fuisse confusam cum sero sanguinis, quod continet substantiam pariter coagulabilem. Sed in hoc libro per *lympham* semper designatur ea sanguinis pars, quæ

co-

Craſſamenti ſuperficies, ubi cruſta non tegitur, in genere lætius rubet, quam ſanguis recenter e vena ductus, dum infima pars obſcuro vel nigricantis eſt coloris. Lætus ſuperficiæ color merito ab accuratioribus nonnullis Auctoribus aëri contiguo attributus fuit; ſi enim craſſamentum invertatur, colores mutantur, ſaltem ea, quæ jam ſuperior evadit, ſuperficies lætiorẽ rubedinẽ aſſumit. Hanc coloris differentiam alii a diverſa particularum rubrarum globulorumve, qui dicuntur, proportionẽ explicare conati ſunt; qui, majori quantitate in infima craſſamenti parte præſentes, ex illorum ſententia efficiunt, ut nigricet; ſi vero invertatur, tunc globuli deſcendunt a ſuperficie, quæ jam ſuperior eſt, hæcque magis rubra redditur.

cogitur, ſive ſponte ſolida fit, ubi ſanguis pelvi receptus eſt; qua in re a coagulabili materia in ſero ſoluta differt, quæ magis convenit cum albumine ovi, in eo, quod fluida maneat, ubi aëri, et cogatur, ubi calori exponitur, vel cum ſpiritibus ardentibus aliisve nonnullis præparatis Chemicis miſcetur.

tur. (d) Hoc autem verosimile non videtur; siquidem lymphæ in crassamento tam firmiter coagulata est, ut illud densius reddat, quam ut corpora globulis rubris aliquanto graviora, aurum v. g., transmittat. Aëris facultas colorem sanguinis mutandi dudum fuit cognita, idque abunde evincit, et hoc phænomenon ulli alii causæ attribuire quam maxime vetat sequens experimentum,

EXPERIMENTUM III.

Venam jugularem cuniculi vivi denudatam tribus in locis ligavi, eamque, inter duas harum ligaturarum aperui, sanguinem emisi, hancque venæ partem aëre replevi. Quum ea brevi sibi esset relicta, donec aër calefieret, abstuli ligaturam, aërem a sanguine separantem, eaque fluida le-

(d) *Vid. SCHWENKII Hæmatol. pag. 115. seqq. qui hanc opinionem tam propriis, quam aliorum experimentis et auctoritatibus probare adnititur.*

lemiter commiscui, atque observavi sanguinem venosum lætiori rubedine tingi eo in loco, ubi bullulas aëreas attingebat, dum cæterum naturalem colorem retinebat, (e)

Sanguis arteriosus colore a venoso differt; ille læte rubet, ut superficies crassamenti; hic obscurus est vel nigricat, velut basis crassamenti. Hæc coloris mutatio in sanguine nascitur, quum pulmones trajicit, ut ex animalium

vi.

(e) Idem experimentum, eodem cum eventu, in cane vivo, qui experimento quarto inserviit, institui. Postea alio in cane vivo idem observavi, nec non in illo, qui experimento sexto inserviit. Notandum autem est, me his in experimentis aëre ex pulmonibus vi efflato usum fuisse; qui certe phlogisticatus dici potest. Adeoque aër phlogisticatus colorem sanguinis non semper in atrum mutare videtur: licet hoc in experimento Dissert. pag. 25, seq. memorato observaverit, et hinc conclusionem eduxerit doct. HAMILTON; nisi hunc Auctorem per aërem phlogisticatum aliam aëris speciem intellexisse statuere malimus; cujus præinde accuratiorem descriptionem tradere debuisset.

vivorum Anatome patet (*); et, dum similis mutatio producitur ab aëre sanguini extra corpus

(*) Hanc mutationem revera in pulmonibus produci, mihi constat per experimenta; in quibus distincte vidi sanguinem lætius rubentem in auricula sinistra, quam in dextra. (f) Statuunt autem nonnulli maximæ auctoritatis Scriptores, se talem differentiam in magno experimentorum, quæ instituerunt, numero non potuisse observare. Hoc autem inde derivaverim, quod serius aperuerint auriculam sinistram post collapsos pulmones, quam ego; probabile etenim videtur, tantam mutationem, quanta conciliatur sanguini per hoc organum moto, post organi hujus collapsum non posse obtinere.

(f) *Idem in cane, brevi ante jugulato, mihi patuit; et in aliis deinde observavi. Nec dicat quis, hanc coloris diversitatem deberi levitati sanguinis arteriosi majori, quam venosi, ob majorem lymphæ coagulabilis, minorem globulorum in illo, quam in hoc, præsentem quantitatem; quum sanguinem, arteria carotide eductum, sanguinem, vena jugulari ejusdem canis eductum, granis duobus et semisse superasse, notaverit doct. HAMILTON in Diff. cit. pag. 29, 30. Idem etiam, quum doct. PRIEST-*

LEY

pus applicato, aër pulmonibus contentus im-
mediata hujus mutationis esse videtur causa:
quomodo autem hoc peragat, nondum est de-
terminatum.

Ut sanguis mutatur in colorem lætius ru-
brum, dum pulmones trajicit, vel ex venoso
systemate arteriosum petit; ita eum colorem
denuo amittit in transitu ex arteriis ad venas
in extremis corporis partibus, præsertim in ho-
mine sano. Subinde autem sanguinem venosum
solito vividiore colore impertitum observare li-
cet, idque sæpe etiam fit in venæ sectione, ut
sanguis primo eductus nigricet, quique porro
prodit, vividiori colore gaudeat. In talibus ca-
sibus sanguis arteriosus in venas transit, absque
ut naturalem mutationem subeat.

Non-

LEY aëra in sanguinem agere posse per vesicam vaccinam
notaverit, eundem tanto magis per tenue sepimentum,
quod aëra et sanguinem in pulmonibus intercedit, in san-
guinem agere posse, conclusit. Vid. pag. 26. seq.

Nonnulla salia neutra idem valent in colorem sanguinis, quod aër; præsertim nitrum. Hinc nonnulli sanguinis arteriosi a venoso differentiam nitro attribuerunt; quod supponebant absorberi ex aëre, in pulmonibus contento. Novimus autem hanc meram esse hypothesein; aër etenim nitrum non continet. Nitrum sane neutiquam unicum est sal neutrum, quod hanc vim in sanguinem exserit; pleraque etenim eorum hac vi pro parte gaudent. Institutis variis hujus rei experimentis, notabiliorrem efficaciam observavi, quam nonnulla salia neutra in sanguinem exserunt; quæ in eo consistit, quod commixta cum sanguine, vix vena educto, ejus coagulationem impediant, cumve fluidum fervent; quin immo et aqua mixturæ addita, tunc gelatinam formet, five coaguletur. Ita, si uncix sex sanguinis humani ex secta vena immittantur salis Glauberiani veri pulverisati uncix dimidiæ, eaque mixtura agitetur ita, ut sal solvatur, ille sanguis aëri expositus non coagulabitur; quod non adjecto
sale

fale factum fuisset. Si vero dupla ferme quantitas aquæ huic mixturæ addatur, tota mixtura mox in gelatinam vertetur, five cogetur; qua gelatina concussa, destruetur coagulum, et pars ita coacta jam separari potest, ita ut fundum petat, seque lympham esse probet.

In hisce sanguinis cum salibus neutris mixturis particulæ rubræ facile fundum petunt, (præsertim si sanguis humanus adhibeatur), et mixturæ superficies pellucida et coloris expers redditur; et a parte rubra effusa, lympham coagulabilem, addita aqua facile separandam, continere deprehenditur.

Pleraque salia neutra tentavi, tabulamque efficaciarum eorum in sanguinem confeci; sed non necesse est ea Lectorem turbare, quum ejus in Medicina usum non perspiciamus: non etenim concludendum est, eorum effectus intra corpus eosdem esse, quos
ex-

extra. (*) Revera, hæc experimenta æque,
ac alia nonnulla, non adeo ut immediate ad Me-
di-

(*) Salia, quæ sanguinem per se fluidum servant, eum-
quæ tamen postea cogi sinunt aquæ commixtum, sunt *Sal*
Glauberi verus, *Sal Digestivus Sylvii*, *Sal Communis*,
Nitrum Commune, *Nitrum Cubicum*, *Sal Diureticus*,
Borax. Sal ex aceto et alcali fossili confectus, et sal ex
aceto et creta paratus.

Sequentia salia pariter sanguinem fluidum retinent, illum
autem non sinunt cogi cum aqua mixtum; *Tartarus Vitrio-*
latus, *Sal Epsomensis*, *Sal Ammoniacus Communis*, *Sal*
Ammoniacus Nitrosus, *Sal Rupillensis*.

Alumen vero sanguini additum hunc mox cogit. (g)

(g) Cum Sale mirabili Glauberi, Nitro, Nitro cubico,
Sale Marino, Borace, Tartaro vitriolato, Sale Epsomensi,
Sale Ammoniaco, eadem experimenta institui, quæ æque
mihi successerunt; observavique, ubi mixtura non agite-
tur, coagulum sanguini induci. Conf. SCHWENKII Hæmatol.
pag. 106, Conf. pag. 145, 146. Mixturis vero agitatiss
idem, quod Auctor refert, apparuit. Scilicet, sanguinis
℥ iij affusis ℥ ij Salis Glauberi, aut Nitri, aut Nitri cu-
bici, aut Salis communis, aut Boracis, sanguis fluidus.
man-

dicinam applicentur, quam quidem ad proprietates sanguinis chemice exponendas, instituta sunt :

mansit, etiam ultra quadrantem horæ sibi relictus; et adjecta dupla aquæ quantitate, sive ℥vj℥, coactus fuit. Sanguis vero, Tartaro vitriolato, vel Sali Epsomensi, aut Sali Ammoniaco additus, fluidus quidem mansit, attamen adjecta dupla aquæ quantitate non coactus fuit. Alumen vero sanguis additus, eadem proportionem, non agitata mixtura, in grumofam substantiam profunde rubram abibat; additis aquæ ℥vj℥, mutabatur in fluidum spissum, grumofum, nec coactus est. Agitata mixtura eorundem ingredientium mox abiit in grumos rubro fuscis; additis post quinque minuta aquæ ℥vj℥, massa tota abibat in fluidum spumofum, fuscum, nec coacta fuit.

Alia quoque, alia sanguini admiscendo, experimenta institui. Ita sanguinis ℥iij adjectis spir. vitrioli ℥ij, agitata mixtura, sanguis mox coactus fuit, quodammodo grumofus et niger; adjectis aquæ ℥vj℥ solutus fuit, fluidus, parum spumofus et magis minusve grumofus reddebatur. Adjecto sanguini eadem proportionem spiritu Mindereri, agitata mixtura coacta fuit, et coagulum nigricabat, nec ab adjecta dupla aquæ quantitate solutum fuit. Additis sanguinis ℥iij Salis Genistæ ℥ij et agitata
mix-

sunt: dum etenim probe mihi conscius eram, majorem cognitionem proprietatum hujus fluidi exigi, antequam deveniri possit ad cognitionem ullius functionis animalis; verbi gratia, quomodo bilis aliæque secretionis peragantur; ideo vehementer hanc rem pleniori luci exponere desiderabam. Hoc scopo varia experimenta in vivis etiam animalibus institui, probe noscens, mea cæterum experimenta nil probatura.

Quum ita sanguis fluidus fervetur addito sale Glauberi, adhucdum retinet facultatem calore, aliisque antea dictis rebus, solo aëre excepto, coagulandi. Hæc methodus sanguinis fluidita-

tem

mixtura, fluidus et late ruber erat, nec ab adjecta aqua coactus est. Addendo tandem eidem quantitati sanguinis Cremoris Tartari Zij, agitata mixtura, sanguinem fluidum manere, colorem ejus in nigricantem vergere, eumque spumis rubris tegi observavi: adjectis aquæ 3vjß evanuit spuma, sanguisque niger et fluidus mansit.

tem conservandi ea de causa utilis esse potest, quia occasionem præbet nonnulla in eodem experimenta instituendi, quæ cæterum non possent institui, quia mox cogi solet vasis eductus.

Hæc facultas falis neutri cuiusdam diu inno-
tuit illis, qui sanguinem pecorum pro alimento
præparant: diu etenim iis in usu fuit, sangui-
nem recipere vase fal commune continente,
eumque profilientem mox agitare; qua re coa-
gulum impeditur, sanguisque adeo fluidus ma-
net, ut per cribrum transeat, nec postea
cogatur. Hac ratione sanguinem aliis rebus in
usus culinares commiscere licet.

Quamquam lymphæ coagulabilis solida red-
ditur, ubi aëri exponitur; longe tamen ab hac
consistentia abest, ubi circulatur, et perpe-
ram fibrosa, etiam dum in vasis sanguiferis
movetur, habita fuit.

Hæc est lymp̃ha coagulabilis , quæ cru-
B stam

stam phlogisticam, five *corium*, quod dicitur, constituit. Polypos cordis pariter format, et aliquando aneurysmatum cavitates replet, arteriarumque divisarum extrema obturat. (h) Ubi intra corpus solida redditur, obstructions et inflammationes creare creditur; nec non sphaceli a frigore nati ejus coagulo attribuantur. Verbo, hæc lymphæ tantum ad causas variorum morborum contribuere credita fuit, ut causæ hujus coaguli, five intra, five extra corpus, exponi summopere mereantur.

Sanguis, pelvi exceptus et quieti commissus, in modico atmosphæræ calore, citissime in gelatinam vertitur, seu coagulatur: pars, quæ jam solida redditur, est lymphæ coagulabilis, ut supra ostensum fuit. Accidentia, quibus jam differt a sanguine venis contento, sunt

(h) *Conf. GREGORY l. c. §. 506. ubi et molarum uterinarum originem ex hoc fonte repetit.*

sunt sequentia : scilicet aëri frigori que expofitus eft et quiefcit; dum enim in corpore eft, aër excluditur, fanguis infigni calore gaudet, moveturque affidue. Quæritur, cuinam horum accidentium ejus coagulum, dum in pelvi eft, præcipue debeatur. Huic quæftioni, me iudice, ex experimentis hactenus institutis, rite responderi nequit. Dictum fane fuit, folum frigus illum coagulare; &, fi fanguis pelvi recipiatur, illaque pelvis aquæ calidæ immittatur, & fanguis bene moveatur, cum fluidum fervari poffe. In his autem experimentis, unde conclusio facta fuit, fallaciam commiffam fuiſſe, deprehendi (*). Verbo, illum cogi tam cito, quum calidus fervatur et agitur, quam, ubi quieti et frigori committitur, deprehendi. Quum res magni momenti mihi videretur, unde hæc coagulatio nafcatur, expiſcari

(*) Id eft, lympa revera coacta fuit, fed per agitationem pariter ſeparata fuit a reliquo ſanguine, et hinc notidam fugit.

scari conatus fui variis experimentis, in quorum singulis sanguis in universum uni tantum caussarum suppositarum pro tempore fuit expositus. Ut v. c. noscerem, an sanguinis coagulatio extra corpus quieti debeat, sequens institui experimentum.

EXPERIMENTUM IV.

Denudatam venam jugularem vivi canis duobus locis ligavi, ita ut sanguis inter ligaturas quiesceret; porro venam cute tectam, ut refrigeratio ejus impediretur, in hoc situ reliqui. Ex variis experimentis hac methodo institutis vulgo sanguinem, post quietem decem minutorum, totum fluidum; quin immo, post trium horarum et quadrantis quietem, ultra duas tertias partes fluidas mansisse, observavi, licet postea coagularetur. Jam sanguis vena ejusdem animalis emissus, intra septem circiter minutorum spatium, perfecte coactus fuit. Coagulatio itaque sanguinis in pelvi, ejusque,
qui

qui tantummodo quiescit, adeo differunt, ut quies sola coaguli extra corpus causa haberi non possit. (i)

Ut frigoris in sanguinem efficaciam viderem, sequens experimentum institui.

EXPERIMENTUM V.

Cuniculum jugulavi, moxque alterutram ejus venam jugularem sustuli, idoneis ligaturis antea cinctam, hancque solutioni salis Am-
mo-

(i) *Idem experimentum institui, ligata duobus in locis vena canis jugulari; qua, post quietem duarum horarum et quadrantis aperta, sanguinem pro maxima parte fluidum emisit, qui brevi post coactus fuit. Animal interea vivum placidumque ulterioribus experimentis inservivit. Hac si consideremus, facile exponitur, cur in suffocatis submersisque, licet jam per aliquot horas mortuis, sanguis adhuc fluidus e pertusa vena fluat; quod saepe clar. FORSTEN observavit; cujus observati parilis ratio est.*

moniaci nivisque, in qua Mercurius 14 gr. thermometri Fahrenheitiani notabat, immisi. Quam primum sanguis in glaciem mutatus erat, venam inde eduxi, eamque aquæ tepidæ immisi, donec degelasset et mollis evassisset. Porro venam aperui, sanguinem vasculo excepi, eumque perfecte fluidum intra pauca minuta cogi, ut solet, observavi. (k) Quum jam hoc in experimento sanguis congelaverit iterumque degelaverit, absque ut

co-

(k) Idem experimentum institui, eodem cum eventu, in vivi canis vena jugulari; quam immisi sali Ammoniaci cum nive trito, in quo thermometrum Fahrenheitianum 16 gr. notabat, et protinus congelavit. Venam deinde aquæ tepidæ immisi, in qua degelavit, et aperta sanguinem fluidum emisit. Postea experimentum in cane vix jugulato iteravi; cujus jugularem immisi mixtura dictæ, 8 gr. thermometri Fahrenheitiani notanti, in qua mox congelavit, et per quinque minuta relicta fuit: dein, tepidæ immissa, protinus degelavit, ita ut secta sanguinem fluidum emisit, brevi coagulatum.

coactus fuerit, evidenter patet, coagulationem sanguinis extra corpus soli frigori non magis, quam quieti, attribuendam esse.

Porro, ut aëris in sanguinem efficacia mihi pateret, sequens experimentum institui.

EXPERIMENTUM VI.

Denudatæ vivi cuniculi venæ jugulari tribus locis ligaturam circumjeci, eamque porro inter duas harum ligaturarum aperui, sanguinemque ex hac parte emisi. Porro aërem calidum vacuæ venæ inflavi, aliamque ei circumjeci ligaturam, eaque quieti tradita, donec censerem aëra eundem acquisivisse caloris gradum cum sanguine, ligaturam intermediam sustuli, aëremque cum sanguine commiscui. Aër colorem sanguinis mox reddebat vividiorum eo in loco, ubi sanguinem attingebat, quod per venæ tunicas apparebat. Lapsa horæ quadrante venam aperui, sanguinemque omnino coactum

deprehendi; dumque sanguis hoc tempore sola quiete perfecte cogi non poterat, aër verosimiliter causa coaguli fuit. (1)

Ex horum experimentorum collatione nonne concludere licet, aërem fortiter cogere san-

(1) Experimentum quoque, itisdem cum cautelis, eodem cum eventu, in viva cane institui, inflato ex pulmonibus aëre. Ut autem aër atmosphaericus sanguinis coagulationem accelerat, ita aërem phlogisticatum eam impedire, notat HAMILTON l. c. pag. 25, seq. qui admoto sanguini, vena felis jugulari contento, aëre phlogistico, post quietem circiter horæ atrum emisit sanguinem; dum æqualis sanguinis portio, vena crurali ejusdem felis æque diu ligata, contenta, citra ullius aëris admissionem quadantenus coagulata fuit. Hoc in experimento certe coagulum sanguinis vena crurali contenti, ex iis, quæ ad experimentum HEWSONI IV, a me repetitum, monita sunt, non magnum fuisse videtur. Præterea aër e pulmonibus vi efflatus, qualem adhibui, atmosphaericus haberi nequit, sed phlogistere est imprægnatus, ut supra monui. Adeoque experimentum doct. HAMILTON non universaliter procedit.

sanguinem, eique soli, neque frigori, neque quieti, præcipue attribuendam esse sanguinis vena educti coagulationem?

Quamvis vero ex his experimentis pateat, sanguinis in pelvim emissi coagulum aëri unice deberi; quia nec frigus hoc valet, nec quies eadē facultate satis gaudet, siquidem sanguis in pelvi intra pauca minuta cogitur, dum sanguis, in venis mere quiescens, trium horarum spatio et ultra non perfecte coactus est. Attamen sanguis temporis tractu sola in venis quiete perfecte cogitur: in hoc autem casu diversa methodo cogitur; ac in pelvi; dumque hac ratione sanguinem intra corpus cogi verosimile est; in hanc rem magis attentus fui et, quomodo hoc fiat, experimentorum ope determinare conatus fui. Hoc scopo sæpius experimentum quartum repetii, quod ut determinarem, an sanguis quiete cogetur, institueram. In primo experimento vena ante lapsum trium horarum et quadran-

tis non fuit aperta; et paullo ante, quam aperiebatur, per tunicas supremam sanguinis partem, ob separationem lymphæ, pellucidam reddi observaveram. Emissus hic sanguis totus quantus fluidus videbatur; pars quidem amissa, maxima tamen vase excepta fuit, quæ postea coacta est, ut solet sanguis aëri expositus. Ex hoc experimento totum fluidum fuisse opinatus fui: sed ex aliis postea institutis mihi constitit, partem amissam coactam fuisse; nam e variis experimentis, licet totus sanguis eo tempore sola quiete non coagulaverit, partem tamen ejus coactam fuisse, jam observavi. Sin autem singula experimenta hoc scopo a me instituta referrem, Lectoris patientia, quam maxime abuterer; quare communem tantum omnium eventum memorabo.

Cane mensæ affixo, ejusque venis jugularibus ligatis, in universum, illas post elapsa decem minuta aperiens, sanguinem adhuc plane fluidum,

dum, five absque ulla coagulationis nota, observavi (*). Ubi post elapsa quindecim minuta eas aperui, prima specie pariter plane fluidus videbatur; sed accurato examine subinde unam, subinde duas tresve exiguas particulas, caput aciculæ ferme æquantes, quæ coactæ erant sanguinis partes, reperi. Ubi serius aperirentur, majus majusque coagulum observatum fuit: (m) sed adeo tarde hoc coagulum processit, ut in experimento, quo accuratius coagulatam partem cum non coagulata contuli, coagulum duo tantum grana ponderare

(*) Dico in universum fluidum fuisse, post elapsa decem minuta; sed pariter memorandum est, me duas minimas nascentis coaguli particulas eodem tempore reperisse; atamen in alio, elapsis licet quindecim minutis, tale phenomenon nullum detegere potui.

(m) Eodem scopo experimentum quartum alio in cane vivo iteravi, et vena jugulari utrimque ligata, et quieti semper prædita, in sanguine coagulum inveni, caput aciculæ altero tanto majus.

dere æquare, postquam vena duas horas cum quadrante ligata fuisset, observaverim; dum reliqua sanguinis pars, quæ fluida erat, coagulationi exposita, undecim grana ponderabat. In hisce ulterius accurate progredi nequeo. Neque exacte tempus, quo omnis sanguis inter ligaturas cogatur, determinare sustineo. Talem venam sane elapso triduo aperiens, coagulum tenue album reperi, quod mera erat membrana; fero et rubris particulis disparentibus. Omnis autem sanguis absque dubio diu ante hoc tempus congelaverat. Methodus, qua sanguis cogitur, ubi in corpore quiescit, mihi egregia apparuit: ideoque magis studui, ut detegerem, quomodo hoc fieret, præsertim quum lucem nobis præbeat in dirimenda questione, an coaguletur vel non coaguletur in corde, ita ut massas, quæ *Polypi* dicuntur, formet. Tempora supra memorata, me iudice, reperiuntur ea esse, quibus sanguis cogitur in venis canum sanorum: quumque per experimenta mihi constitit, sanguinem canis

nis et hominis sani extra corpus eodem ferme tempore cogi, id est, incipere coagulationem intra tria quatuorve, et perfectam esse intra septem octove minuta; hinc, sanguinem in venis corporis humani eodem ferme tempore cum canino cogi, facile concluderim. Opus autem est, ut hic addam, mihi ex experimentis a me institutis rationem sufficientem esse credendi, tempus, quo sanguis coagulatur, in variis corporibus variisque morbis varium esse. Licet enim sanguis hominis sani perfecte coaguletur intra septem minuta, postquam e venis ductus est; nonnullis tamen in morbis quindecim vel viginti minuta, immo sesquihoram elabi antequam perfecte coactus foret sanguis, observavi.

Quum in supra memoratis experimentis sanguinem in corpore, intra breve temporis spatium quieti traditum, cogi observavi, nonne et huic causæ ejus coagulum in veris his aneurysmatibus, in quibus sacculus observatus est,
de-

deberi probabile est (*)? In talibus etenim dilatationibus pars sanguinis motu caret, quæ cogetur, dum quiescit, faccumque attingit, et ita lamella formari potest; et sacco postea dilatato, alia sanguinis portio tunc quiescet, et ita altera lamella formari potest; et hinc probabiliter hæc coagula lamellata in talibus saccis nascuntur.

Pariter quieti sanguinis coagulatio in arteriis majoribus, post amputationem aliasve operationes ligatis, probabiliter debetur; quia plerumque factis talibus deligationibus pars arteriæ impervia est, in qua sanguis moveri nequit. Coagulum, amputationi succedens, aëri revera deberi credi potest; sed, si consideremus, qua ratione arteriæ ligentur, dum sanguis ex iis effluit, aërem ullam in sanguinem, supra ligaturam contentum, efficaciam

(*) Exemplum hujus rei videri potest in *Med. Obs. and Inq. Vol. I. Artic. XXVII. fig. III.*

ciam habere , non videtur verosimile.

Dum sanguis in cavo uteri non movetur, hinc verosimiliter cogitur. Hinc tanta nascuntur coagula, quanta subinde ex hoc cavo emittuntur; quæque, feri globulorumque rubrorum emissionem magis condensata, faciem carneam assumunt, et sæpe *Molæ*, sive *conceptiones spuriae* dicuntur. (n)

In experimento quinto sanguinem citra coagulationem congelare, & denuo degelare posse vidimus: hoc pariter experimentum sæpe repetii, ut plenam ejus haberem certitudinem. Subinde etiam experimentum mutavi, vena phialæ aqua plenæ immissa, omnibusque congelatis in sale Ammoniaco nive soluto; subinde venam ipsi solutioni immisi; eamque ter quaterve oleo immisi, tuncque gelu commisi. Horum vero omnium experimentorum idem fuit eventus. Sanguis semper, post degelationem evi-

den-

(n) Conf. GREGORY l. c.

denter fluidus erat, evidenterque cogeatur, quum aëri exponeretur.

Non tantum aëri expositam cogi lympham coagulabilem, sed et, æque ac serum, calore fixari, notum est; sed caloris gradus nunquam, quantum novi, determinatus fuit. Creditum fuit, requiri gradum ferme æqualem ei, qui serum cogit (*); sed multo minor requiritur, ut sequentibus experimentis patebit.

EXPERIMENTUM VII.

Postquam ex variis experimentis, sanguinis, qui ope salis Glauberi veri fluidus erat servatus, lympham calore 125 gr. thermometri Fahrenheitiani coactam fuisse, observaveram; gradum requisitum, quo in statu naturali figatur, non multum hinc posse differre, conjeci.

Ideo

(*) Vid. *Traité du Cœur. T. II. p. 93.* SCHWENKE
Hematolog. p. 138.

Ideo foculum flamma lampadis ardentem præparavi, eique parvum vas, aqua repletum, impositum, quæ ad 125 gr. caluit; tumque nudatam venam vivi canis jugularem accurate ligavi, partem ejus excidi, eamque huic aquæ immisi. Elapsis undecim minutis, venam inde eduxi et aperui, sanguinemque plane coactum reperi. Hinc 125 gradus, vel pauciores, coagulationi sanguinis canini sufficere, conclusi. Hic observasse conducet, partem coactam solam lympham fuisse; serum etenim majorem ut fixetur, requirit calorem; nempe 160 graduum, ut infra patebit.

EXPERIMENTUM VIII.

Idem experimentum repetii tali modo, ut calor nunquam 120½ gr. superaret; venamque, elapsis undecim minutis, aperiens, lympham hoc etiam calore plane coactam fuisse, observavi.

C

EX-

EXPERIMENTUM IX.

Experimentum repetii, calore ~~gradus~~ 114 non superante; elapsisque undecim minutis, post apertam venam sanguinem fluidum reperi; et, pauca postea aëri expositus minuta, pro more cogebatur. Quum jam sanguis in præcedenti experimento, calore nunquam gradus 120½ superante, coactus; & hoc in experimento fluidus fuerit, licet calori 114 graduum expositus; hinc, coagulabilem sanguinis lympham in cane sano cogi caloris gradu, inter 114 et 120½ gr. thermometri Fahrenheitiani intermedio, concludere licet. (o)

Gra-

(o) *Gradum caloris, ad sanguinis canini coagulum requisiti, esse inter 114 et 120 gr. intermedium, observavi experimento; in quo venam jugularem vivo cani exsectam immisi aquæ, 114 graduum calorem æquanti, eamque mollem manere observavi: calorem ad 120 gr. auxi et post 11 minuta venam aperui, quæ emisit coactum planè sanguinem, qui venæ figuram exactè referebat. Observavi pariter in*
vena

Gradum caloris, quo lymphæ in sanguine humano cogatur, nondum aptior mihi fuit occasio experiendi, quam sanguinem cum sale Glauberi miscendo; in quo statu coquebatur ad calorem 125 graduum. Quum autem sanguinem humanum et caninum aëri expositum eodem ferme tempore cogi observemus; justum gradum caloris, quo lymphæ sanguinis humani coagulatur, esse inter gradus 114 et 120 $\frac{1}{2}$ intermedium, vero mihi videtur simile. Experimentum instituere constitui in fune umbilicali

re-

vena jugulari, vivo cani excisa, exposita calori graduum 120, ad 130 aucto, coagulum sanguinis multo firmitus solidiusque, ipsumque in colorem nigricantem conversum fuisse. Adeoque, licet doct. HAMILTON in diff. cit. pag. 16, 17. Not. †. in portione funiculi umbilicalis infantis, in aqua ad 118 gr. calefacta per septem momenta relicta, lympham non coactam se reperisse, moneat, quod experimentum non repetiit; non tamen inde, sanguinem calore 120 graduum minorive non cogi, concludere licet: nec experimentum apodicticum censet ipse Auctor.

recentis placentæ , quæ forsan aptissima via est veritatem assequendi.

Caloris gradus , quo serum sanguinis (quod cum lympa nullatenus confundi debet) cogitur , in universum statutus fuit 150 gr.: (p) ex meis autem experimentis majorem gradum caloris ad ejus coagulum , requiri , facile mihi persuadeo. Hæc sequenti rationi institui.

EXPERIMENTUM X.

Sumi phialam , amplo orificio instructam , aliquantum feri continentem , eamque , immisso illi thermometro , aquæ imposui , quam subjecta lampas calidam fervabat ; hocque experimento , quam maxima cura instituto , calorem 160 graduum requiri observavi , id est,

(p) *Immo SCHWENKIUS l. c. pag. 139. dicit calore 148 gr. cogi.*

est, quadraginta circiter gradus ultra, quam ad cogendam lympham requiruntur. (q)

Quum sanguis calore cogatur, quumque calor animalis in febribus auctus sit, sanguinem calore animali, etiam, dum in vasis movetur, cogi posse creditum fuit. Hæc autem opinio debili fundamento nititur, siquidem calor animalis naturaliter 98 tantum vel 100 gr. æquat, et in ardentissimis febribus ultra 112 gr. non adscendit. (r)

CA-

(q) *Serum sanguinis 160 gr. thermometri Fahrenheitiani ad plenarium coagulum exigere, ex sero humano, vitulino et bovillo mihi patuit. Conf. doct. HAMILTON, l. c. pag. 6, 16; qui idem statuit.*

(r) EXPERIMENTUM X*.

Ante, quam hoc caput mittam, hic addere juvat experimentum, cum dictis meis Commilitonibus, doct. JANSEN, dissertationem inauguralem, de Pinguedine animali, jam

CAPUT II.

De Crusta, sive Corio phlogistico.

Jam ad crustæ phlogisticæ, sive corii, quod
di-

publicæ defensionem, conscribentis, gratia, institutum. Venæ scilicet jugularis canis vivæ superius deligatæ, ne sanguis ad cor descenderet, inferiori parti tubulum immisimus, per quem ei pinguedinem caninam ad fluiditatem, non ultra calentem, leniter ingessimus, eo cum eventu, ut irata canis intra operationem quieverit, mox apoplectica redderetur, et tandem asthmatica. Elapso ferme trihorio, quum anxiam vitam adhuc ageret, commiseri illam istu necavimus, et Anatomen instituimus. Pinguedinem vero immissam neque in corde, neque in vasis observavimus. In anatomica etiam hujus canis dissectione quatuor foetibus gravidum vidimus uterum.

dicatur, formationem inquirendam progrediar.

Hoc insigne phænomenon in morbis inflammatoriis frequenter occurrit, et formatur a lymphâ sanguinis coagulabili, post particulârum rubrarum descensum, coacta. Hæc sane crusta a sanguinis sero formari credita fuit; et egregius quidam Auctor dubitare videtur, utri attribuenda sit. (s) Eam autem solâ
lym-

(s) Denotari hic videtur SCHWENKIUS, qui in Hæmatol. pag. 158. seqq. censet, esse aliquid inter serum et cruorem intermedium; quia cæteroquin ejus naturam non facile explicare potuit. Censuram autem hic inprimis meretur J. B. GABER, qui in tract. cit. in explicando pure et crusta phlogistica serum cum lymphâ ubique confudisse observatur. Corium autem hoc a sero reapse differre, vel exinde patet, quod placenta sanguinis corio tali recte sero fluido undique cingi appareat. V. SCHWENKIUS l. c. pag. 157.

lymp̃ha sanguinis coagulabili , post particularum rubrarum descensum , formari ex experimentis sequentibus liquet.

EXPERIMENTUM XI.

Mense Junio , thermometro in umbra gradus 67 notante , venam secui viro , per aliquot menses phthisi pulmonali laboranti , eoque tempore dolore lateris correpto. Sanguis , licet tenui flumine exiret , tanta tamen velocitate fluebat , ut cito pelvim repleret. Ligato brachio ad sanguinem attendi , ejusque superficiem reddi pellucidam observavi , eamque pelluciditatem sensim sensimque profundiorē observavi , sanguine fluido manente. Pariter observavi , coagulationem primum a superficie aëri contigua incipere , et tenuem pelliculam formare ; quam remotam cito altera excipi , observavi. Partem pellucidi liquoris cochleari humido abstuli , eamque cum æquali.

li aquæ quantitate phialæ immisi, alteram partem in cochleari retinui; et postea utramque, ut et crassamenti superficiem, crustam densam formantem, coagulari observavi. Digito partem, cochleari contentam, premens, hanc parum feri continereprehendi.

Ex hoc experimento evidenter patet, materiam, quæ corium formavit, fluidam fuisse, postquam e vena fuerat emissâ, coactamque fuisse, ubi aëri exponebatur: quumque hæc solius lymphæ coagulabilis, non vero feri, natura sit; quin corium ex lymphâ fuerit formatum, nullum dubium restat.

Sequens experimentum, institutum in sanguine, aëri non exposito, idem evincit.

EXPERIMENTUM XII.

Jugulato cani mox venas jugulares prope sternum ligavi, ejusque caput de margine mensae suspendi ita, ut partes venarum ligatae capite altiores forent. Identidem ad venas attendi, hasque in parte superiore pellucas reddi, particulis rubris fundum petentibus, observavi. Porro alterutram venam ligavi ita, ut pellucidam sanguinis portionem a parte rubra separarem; venaque aperta, illam partem emisit, quæ adhuc fluida erat, sed paulo post coquebatur. Hoc coagulum premens parum feri continere observavi. Alteram venam non aperui, antequam sanguis coagulatus esset, tuncque superficiem coaguli albam, velut crustam sanguinis pleuritici, deprehendi. (*) (t)

Por-

(*) Hoc non unicum fuit animal, ad speciem sanum, cujus sanguis crusta tectus fuit; idem in aliis observavi. Unde primum suspicatus fui, si sanguinem brevi tantum fluidus fervetur, huic phænomeno producendo sufficere: senten-

Porro, corium meram esse lympham coagulabilem, per descensum particularum rubrarum separatam, apparebit unicuique, qui, ex SYDENHAMII consilio, digitum, vel cochlear per sanguinem moveat, quum ejus superfici-

entiam autem intavi, in plerisque animalibus hoc non fieri observans; nec semper observatur in cordibus illorum hominum, qui violenta morte occubuerunt, licet sanguis diutius fluidus remaneat in talibus casibus, quam solet in pelvi, ubi crusta apparet.

(1.) Idem experimentum, five bina experimenta hic memorata, duobus in canibus iteravi. In primo mox post partem venam jugularem ligavi, capite de mensa dependente, et sensim magis magisque in suprema parte pellucidam fieri venam observavi: porro partem pellucidam a reliqua per ligaturam separavi, fluidumque pellucidum emissi, dein coagulatum. In altero vixit canis post meridiem totam venam jugularem denudavi, dein animal ita necatum fuit, et jugularem utrimque ligavi, vespere jam tertiae venae pars ferme pellucebat, et sequenti mane venam aperui, sanguinemque coactum, crusta albicante totum, observavi.

ficiem pelluentem reddi observet. In hoc enim casu sanguis, qui cæterum crusta fuisset tectus, jam in naturali statu, sive corio privatus, manet; quia rubrarum particularum descensus impeditur. (u)

Communiter recepta fuit opinio, inflammationem sanguinem inspissare, eumque ad coagulationem magis disponere. Quin nonnulli eo progressi sunt, ut in his morbis, ubi crusta inflammatoria apparet, sanguinem, nondum vena edu-

(u) Corium hæc meram esse lympham coagulabilem, etiam probant experimenta doct. J. C. BAERTS, qui observavit, crustam et partem fibrosam, in cruore sanguinis inflammati residuam, unius ejusdemque hominis eodem tempore fuisse putredine correptas. Hic pariter sanguinis, crusta tecti, cruorem longe minorem fibræ copiam continere, quam sani, notavit. Idem insuper ex inferiore crustæ superficie fibras nodorum forma ad cruorem demissas, et diffisso cruore, plus fibræ in superioribus stratis, quam in inferioribus adesse, observavit. *Vld. Diff. de Natura Sanguinis inflammat. Exp. II, IV, V, VII.*

eductum, ferme coactum esse, dixerint. (v)
Jam per experimenta de contrario mihi persuasum est; siue inflammationem non augere diathesin ad coagulandum in sanguine, sed eandem revera minuere; sanguinemque non inspissare, sed revera attenuare; saltem eam partem, quæ crustam format, lympham nempe coagulabilem. (w)

Primo loco, inflammationem diathesin ad coagulandum revera minuere, patebit unicuique, qui ad coagulationem sanguinis, crusta tecti,

(v) *Varios inter Auctores, qui sanguinis inflammatorii spissitudinem adstruere tentarunt, memorandi imprimis videntur BOERHAVIUS in Aphor. N. 100, SWIET. Comm. Tom. I. pag. 143, seq., SCHWENKIUS in Hæmatol. imprimis Cap. XVI, GAUBIUS in Instit. Pathol. Med. § 360, 366.*

(w) *Monuit jam CULLENIUS in Prim. Lin. Prax. § 236. N. 2—5. multa esse sub inflammatione phenomena, quæ sanguinem solito fluidiorem esse, probabiliter doceant. HEWSONI opinioni etiam adscribit GREGORY l. c. § 504.*

recti, attendat. In omnibus enim his casibus sanguis solito tardius coagi reperietur. (x) Ad hanc opinionem primum perductus sum, ad sanguinem phthisici supra memorati attendens; sed porro collationem institui, quæ idem evincere videtur. E variis etenim experimentis, in sanguine hominum fere sanorum, aut saltem qui nullo morbo inflammatorio laborabant, quorumque sanguis corio carebat, institutis, sanguinem, vena emissum, intra 3 circiter minuta coagi incipere observavi. Prima coaguli forma tenuis erat membrana prope bullas aëreas, sive prope marginem pelvis. Hæc membrana per superficiem dispergebatur, sensimque crassior reddebatur, donec omnis sanguis coactus foret, scilicet intra 7 circiter minuta post apertam venam; et intra 10 circiter vel 11 minuta adeo firma erat, ut, placenta secta, incisuræ sero mox replerentur, quod jam a crassamento separari in-

(x) *Observavit hoc etiam doct. J. C. BAERTS in diss. cit. § 26.*

incipiebat. In iis autem, quorum sanguis crusta phlogistica erat obductus, coagulatio multo ferius procedebat, ut ex experimento proximo patebit.

EXPERIMENTUM XIX.

Sanguinem mulieri, septem menses gravidæ, misi, sanguisque pelvi receptus fuit. Quinque minutorum, post sectam venam, spatio, primum membrana apparebat; hæc vero adeo lente spargebatur, ut intra decem minuta totam superficiem nondum tegeret; quindecim minutorum spatio totam ferme superficiem tegebat; sed reliqua sanguinis pars plane fluida erat, saltem ad aliquam altitudinem, nec intra semihorium tam firmiter coacta fuit, quam postea. Hoc in casu crassissima et densissima erat crusta, sive corium.

EX-

EXPERIMENTUM. XIV.

Sanguis, homini, vehemente dolore pectoris rheumatico laboranti, per venæ sectionem detractus, tribus vasculis receptus fuit, quorum singula postea crustam manifestarunt. In primo progressum coagulationis sequentem observavi. Initium coagulationis non notaveram, sed elapso semihorio membrana vulgari charta scriptoria non erat crassior; hac remota paullulum lymphæ limpidae sublatum fuit cochleari humido, vasculo mundato immissum, quod viginti insuper minuta coagulando impendebat. Elapso sesquihorio omnis sanguis non coagulatus erat; eo enim tempore membranam sive pelliculam removi, & alteram lymphæ limpidae portionem cochleari sustuli, et vasculo immisi, in quo postea cogeatur; licet hæc gelatina revera non adeo firma foret, ac ipsum crassamentum.

EX-

EXPERIMENTUM XV.

Mulieri, levi angina correptæ, octo sanguinis uncia e brachio detrahebantur; sanguis pelvi recipiebatur, et præterlapsis ab operatione 4½ minutis sistebatur hæmorrhagia, quo tempore membrana prope bullulas aëreas formabatur; intra 7 minuta crusta pellucida apparebat, insigni parti superficiei, quæ plane fluida erat, obducta, dum reliquus sanguis cogeбatur; crusta rubra valde distincta reliquæ superficiei obducta.

Conferendo jam hæc experimenta cum iis, quæ de coagulatione sanguinis, crusta phlogistica sive corio non obducti, observata sunt, nonne evidenter patet, sanguinem diutius fluidum fervari, postquam aëri est expositus, et minorem ad coagulationem habere proclivitatem, ubi crusta adest, quam ubi abest? Ubi enim hac caruit, sanguis intra septem minuta plane cogi fuit observatus; in aliis vero ca-

D

si-

sibus, ubi corium valde crassum fuit, non minori tempore, quam intra sesquihorium, perfecte coactus fuit.

Facultas, qua inflammatio gaudet, diathesi lymphæ ad coagulandum minuendi, ex sequenti etiam experimento constat; in quo sanguis in corde animalis mortui tardissime coactus fuisse videtur.

EXPERIMENTUM XVI.

Canis jugulatus fuit octo horis, postquam magnum cervici ejus inflictum fuerat vulnus, quod interim insigniter inflammatum erat. Quum illum postridie tredecim post mortem horis cultro anatomico subjicerem, polypus magnus albicans in ventriculo cordis dextro reperiabatur; sub quo parum sanguinis adhuc dum erat fluidum, qui cochleari exceptus, et aëri expositus, mox coactus fuit.

Hic

Hic notare juvat, me in cordibus animalium, citra ullam inflammationem defunctorum, omnem sanguinem diu ante hoc tempus plane coactum observasse. Illaque variis temporibus aperiendo observavi, sanguinem coagulari in eorum cordibus post mortem, eodem graduum processu, quo in venis, ubi ejus motus per ligaturas impeditus est, cogitur; ut pag. 23 relatam fuit.

Sanguinem porro in morbis inflammatoriis, ubi crusta alba, sive corium apparet, revera tenuiorem esse, propter sequentes rationes probabile est. I^o. vel ad oculum tenuior apparet. (y) II^o. rubrae particulae, sive globuli, in tali sanguine citius descendunt, quam in sanguine

(y) *Crassamentum etiam sanguinis phlogistici laxius tenuiusque esse, quam sani, notavit doct. BAERTS l. c. § 9, N. 2. § 25, 28.*

guine animalis fani. Hoc probari videtur observando, in supra memoratis experimentis sanguinem, ubi in venis quiescebat, crusta non fuisse obductum, nisi in uno alterove casu; licet in omnibus his casibus diutius maneret fluidus, quam in pelvi, post venæ sectionem, ubi crusta apparet, fieri solet. Rursusque, sanguis animalis, violenta morte extincti, non semper crusta alba tectus est, licet adeo tarde coaguletur. Hæc phænomena evincunt, aliquando plus, quam imminutam ad coagulationem proclivitatem requiri, ut crusta, sive corium, formetur. III°. globuli in affectibus inflammatoriis citius a superficie totius massæ sanguinæ ad fundum descendunt, quam postea a superficie mixturæ cum sero solo, descensuri sunt; quod experimenta sequentia probant. Ante vero, quam illa referam, observari velim, ea instituta esse, ut detegeretur, an crusta phlogistica ulli alii causæ, quam lymphæ coagulabilis attenuationi, imminutæque ejus ad coagulandum diathesi, tri-

tribui posset: quumque idem phænomenon ab aucta specifica gravitate particularum rubrarum, vel a solo fero attenuato, nasci posset conjici, quæstionem sequenti methodo dirimere tentavi.

EXPERIMENTUM XVII.

Phialæ, littera A notatæ, unciam feri sanguinis hominis, cujus crassamentum crusta phlogistica obducebatur, immisi.

Alteri, littera B insignitæ, unciam feri hominis, cujus sanguis crusta carebat, immisi. Porro utrique addidi cochlear feri, gravidi particulis rubris hominis, cujus sanguis crusta, sive corio phlogistico, carebat. Ad hæc attendens, particulas rubras aliquanto citius fidere in fero sanguinis crusta obducti, quam in fero sanguinis crusta destituti, nullatenus observare potui. Hinc concludo, ferum non attenuatum esse iis in casibus, ubi crusta phlogistica apparet.

D 2

Ut

Ut denique pateret, an gravitas globulorum rubrorum specifica aucta esset, sequenti modo progressus sum.

EXPERIMENTUM. XVIII.

Phialæ C portionem feri sanguinis crusta destituti; pariterque alteri D aliam ejusdem feri portionem immisi. Phialæ C porro immisi cochlear ejusdem feri, impertiti particulis rubris sanguinis, crusta phlogistica tecti. Phialæ D immisi cochlear ejusdem feri, repleti globulis sanguinis crusta carentis. Hæc considerans, observare non potui, globulos sanguinis, crusta phlogistica tecti, citius fundum petere, quam sanguinis crusta carentis. Hinc, gravitatem specificam rubrarum particularum, sive globulorum, qui dicuntur, non auctam esse, ubi crusta apparet, conclusi. Ideoque, dum crusta phlogistica, sive corium, neque feri attenuationi, neque auctæ rubrarum particularum gravitati specificæ deberi videtur,

pro-

probabiliter a sola mutatione lymphæ coagulabilis dependere videtur. Quodque hanc conclusionem ulterius firmare videtur, in nullo horum experimentorum particulæ rubræ a superficie feri intra 20 minuta descendebant; licet, ubi crusta adest, a superficie sanguinis intra dimidium temporis spatium fidant: ita ut tota sanguinis massa tenuior videatur, quam solum serum, vel lympa coagulabilis his in morbis tantum attenuata videatur, ut vel serum diluat; quod prima specie paradoxum videtur.

Nonne itaque concludere licet, his in casibus, ubi crusta inflammatoria apparet, lympham coagulabilem tenuiorem esse, ejusque ad coagulationem proclivitatem imminutam? Quæ duo aliquid conferunt ad descensum particularum rubrarum a superficie sanguinis, quæ tunc coacta ansam dat huic phænomeno, quod crusta phlogistica sive corium au-

dit, in sanguine hominum pleuritide aut rheumatismo laborantium (*).

Quantopere conclusioni, ad quam hæc experimenta ducunt, contrariantur nonnullorum Auctorum hac de re opiniones ! Quoties occurrunt, qui sanguinem in affectionibus inflammatoriis, ubi hoc corium occurrit, spissorem esse, (z) ampliusque orificium ad sanguinem

(*) Hoc insigne phaenomenon sane attribui posset lymphæ, his in morbis ad superficiem sanguinis adscendenti; hoc autem non est verosimile, si consideremus, eam, ubi coacta est, majori gravitate specifica gaudere, quam serum, inque hoc fundum petere.

(z) *Vid. Auctores supra allegati. Non majori, ut videtur, jure summus GAUBIUS Inst. Pathol. § 366. in Not. sanguinem inflammatorium, licet tardius cogatur, quam sanus, hoc tamen spissorem magisque coagulabilem esse, contra nostrum Auctorem statuit; quum præter memoratas ab Auctore observationes, doct. BAERTS, (ne alios memorem) experimenta, crustam citius putrescere, quam reliquas san-*

guinem morbosum emittendum requiri, statuunt! Amplius orificium minus amplo sæpius præferendum esse, ubi talis sanguis reperitur, credo: ejus autem commoda emissioni spissioris sanguinis deberi, ex iis, quæ in experimentis supra dictis observavimus, non videtur verosimile; illi forte vero propius accedunt, qui hæc evacuationis celeritati tribuunt.

Notandum hic est, hoc corium, sive crustam albam; certum inflammationis indicium non præbere; siquidem sæpe occurrit, ubi talis morbus non apparet, præsertim in sanguine
gra-

sanguinis partes; cruorem phlogisticum laxiorem tenuioremque esse, quam sanum; immo crustam, quæ dicitur, phlogisticam, fibramque, in crassamento sanguinis phlogistici residuam, citius, quam fibram sanguinis sani, putredine corrumpi, evicerint. Vid. Diff. cit. Exp. I. § 9. N. 2. et § 25, 28, 30.

gravidarum: (a) illamque variis in casibus variæ esse densitatis; aliquando admodum firmam, alias spongiosam sive cellularem, multumque feri in cellulis continere. Has differentias infra, quum Lectori nonnullas alias de lymphæ coagulatione observationes tradiderimus, explicare tentabimus (*).

(a) *Conf.* SCHWENKII *Hæmatol.* pag. 156. A. DE HAAN *Rat. Med. Part. III.* pag. 130. seqq. Ed. Vienn. *nec non* *Part. IX. Cap. 2. § 8. &c.*

(*) Licet hic tractatus tam sero prelo commissus fuerit, pleraque tamen, quæ in superioribus paginis occurrunt, æ me in lectionibus Anatomicis, elapso anno 1767, semper fuerunt memorata; et nonnulla eorum paullo ante illud tempus publice memorata erant. Hoc visum fuit notatu dignum, siquidem multa eorum dein ab aliis publicata fuerunt.

CA-

CAPUT III.

*De Cauſſis , quare cruſta phlogiſtica vario tem-
pore in venæ ſectiōe appareat ; de hæmorrha-
giarum conſtipatione ; frigorisque in
ſanguinem efficacia.*

Ab illis , qui de ſanguine ſcripſerunt , no-
tatum fuit , nonnunquam ſecta vena ſanguinem , primo vaſe receptum , cruſta phlogiſtica tegi , dum ultimo receptus ea caret : hujus tamen differentiæ apta ratio non fuit data. Supponi forſan poſſet , hoc cuidam circumſtantiæ in ſanguinis miſſione deberi , v. c. variæ velocitati , qua ſanguis in quodque vaſ influxerit , vel concuſſioni ultimi vaſis , qua lymphæ ſeparatio impedita fuerit : cruſtam autem vidi , ubi nulla hujusmodi differentia aderat , neque alia circumſtantia , quam obſervare potui. Hinc talibus in caſibus ſanguinis proprietates mutatas eſſe , vel in ipſa evacuatione , ſuſpicatus fui ;

fui; ad quam opinionem me sequentia perduxerunt experimenta.

EXPERIMENTUM XIX.

Novem sanguinis unciae detrahebantur mulieri tertio post partum die, quo tempore feбри, cum gravi lateris et abdominis dolore, laborabat. Sanguis pelvi receptus et brachium deligatum erat; quum, ad sanguinem attendens, ejus superficiem ad quandam altitudinem vidi transparentem; quæ pelluciditas futuræ crustæ erat indicium. Quumque dolor non minutus esset, pulsusque id fineret, ligaturam a brachio sustuli, et ultra sex ferme sanguinis uncias duxi, vasculisque tribus excepi; sed, quod mihi notandum videbatur, licet sanguis æque celeriter in singula vascula, ac in pelvim, flueret, quumque repleta mox ad eandem fenestram essent posita, nulla atmen crusta sanguinem, vasculis contentum, tegebat, licet densissima sanguinem, pelvi receptum, te-
ge-

geret. Infuper, licet fanguis pelvi contentus nonnullis minutis prius, quam fanguis vasculis receptus detractus effet, ferius tamen perfecte coactus fuit; ut collatione instituta manifestum erat.

Vesperī idem experimentum repetendi mihi fuit opportunitas; dum enim symptomata inflammationis æque violenta videbantur, congruum videbatur Medicis eam curantibus ulterius sanguinem mittere; quod factum fuit idem orificium aperiendo, quo tria vascula ferme replebantur, quæ eodem loco reponebantur. Observatum porro fuit, sanguinem primo contentum crassa tegi, licet non adeo crassa, ac post priorem venæ sectionem; duo autem reliqua vascula hanc non exhibebant, licet in eadem sanguis etiam citius, quam in primum, fluxisset (*).

EX-

(*) Quum hoc experimentum contrarium videatur nonnullis infra memorandis in eo, quod ultima vascula paullo
ci-

EXPERIMENTUM XX.

Viri nobilis, morbo inflammatorio laborantis, e brachio novem sanguinis unciae sunt detractae. Haec quantitas in quatuor portiones divisa est; prima, recepta vasculo, unam unciam aliquantum superabat; altera pelvi recipiebatur, duas uncias æquans; tertia vasculo, unam unciam continente; et quarta pel-

cius repleta sint, sanguisque tamen iis contentus citius coactus sit; quod vasorum actioni, sub finem operationis validiori, quam in initio, tribui posset; ideo notandum est, differentiam in hoc experimento unice diversae orificii magnitudini tribuendam fuisse visam; quum enim ligatura primum removebatur, pristinum vulnus minus apertum fuit, quam postea, quum magis dilataretur, ut evacuatio accederetur. Non autem, mox initio operationis de brachio guttatim prolabebatur, ut in experimento XXVII; ubi magnitudo orificii non aucta fuit, et tamen, quo magis progrediretur operatio, tanto magis velocitas sanguinis interivit; quam auctae vasorum sanguiferorum actioni tribuendam esse, hinc conclusum fuit.

pelvi, ad triūm unciarum quantitatem. Quodlibet vas immediate ad fenestram ponebatur; et in primo sanguinem serius cogi, totaque sua superficie crusta tegi; in altera pro parte tantum superficiem crusta tegi; in tertio vero quartoque crustam deficere, sanguinemque duobus aliis prioribus citius cogi, manifeste observabatur.

Quum jam in his experimentis sanguis prioribus vasculis contentus serius coactus fuerit, quam, qui ultimo continebatur; quumque sanguis unice in prioribus vasculis crusta tectus fuerit, nonne probabile est, durante brevi tempore, evacuationi impenso, proprietates lymphæ mutatas esse, et ab hac mutatione corruptum evanuisse? Primò sane intuitu, fieri forsitan potuisse videtur, ut venæ sectione sola pars vitiataeducta fuerit: sed hoc ne vero quidem simile est; si enim ponamus partem tantum sanguinis vitiatam fuisse, hæc pars per totam massam æqualiter diffundi debuisset, nec

eam

eam ante reliquum sanguinem e vasis exituram fuisse, probabile est; adeoque in ultimo, æque ac in primo, vase apparere debuisset, quod tamen non fuit factum. Venæ sectio pròinde his in casibus naturam sanguinis mutat, non vitiatam partem removendo, et novo sanguini, formando locum cedendo, ut creditum fuit: sed probabiliter hanc vaforum sanguiferorum conditionem mutando, a qua lymphæ tenuitas et imminuta ad coagulandum diathesis dependet; quod ipsum certe attentionem meretur (*).

Ex hac observatione ducimur ad opinandum, utile fore sæpius sanguinem parvis vasculis potius,

(*) Proprietates sanguinis vasa sanguifera evacuando mutari posse, pariter constat ex experimento infra memorando; ubi sanguis animalis sani diathesin ad coagulandum tanto majorem habere fuit observatus, quo vasa magis vacua, et animal debilius foret. Notare etiam juvat, licet e duobus tantum experimentis hæc conclusio elicitæ sit, me idem tamen phænomenon aliis etiam in casibus, quos memorare superfluum duxi, observasse.

tius, quam pelvi, recipere, et diligentius ad ejus a venæ sectione mutationem attendere; qua ratione forsân melius definire, quænam quantitas in singulis casibus detrahenda sit, discamus. Probabile enim videtur, operationem quoque eo plus valere in morbum, quo per eam sanguinis ad coagulandum diathesis magis mutetur. De hac mutatione judicium ferre possumus, conferendo sanguinem, primo vase contentum, cum eo, qui ultimo vase continetur; primum enim vas proxime statum sanguinis in initio, et ultimum eundem ad finem evacuationis exhibebit.

Sæpe fit, ut crusta non totam superficiem, sed partem tantum crassamenti tegat, quod per magnas maculas striasve fieri observatur. His in casibus observavi, partem tantum sanguinis imminutam proclivitatem ad coagulationem habere; veluti in experimento XV, in quo nonnihil sanguinis fluidum et pellucidum manebat, ubi hæ striæ apparebant, aliquamdiu postquam aliæ superficiei partes cogi inceperant.

E

rant.

rant. Utrum jam his in casibus eadem adfuerit differentia, antequam vena aperta fuit; an vero omnis sanguis non inflammatoriae indolis fuerit ante venae sectionem, et pars ejus in ipsa evacuatione, an vero demum, cum generalis plenitudo diminuta foret, mutata fuerit, quæri posset. Ex iis autem, quæ in ultimo experimento observata fuerunt, me judice, verosimilius est, illum durante evacuatione mutatum esse.

Quum hunc lymphæ in coagulationem nimis auctum esse per venae sectionem, vel per debilitatam vaforum sanguiferorum actionem vidissem, in his forsan casibus, ubi corpus valde debile est, diathesin ad coagulandum adeo augeri posse suspicatus fui, ut non intra tria quatuorve minuta, postquam vena educus est, cogi incipiat (ut in sanis hominibus fit), sed coaguletur minori tempore, sive momento ferme citius. Censui enim, nisi hoc fieret, vix concipi posse, quomodo sanguini

un-

anquam tempus foret coagulandi in ruptis vasis, ita ut hæmorrhagias sisteret; quod facere creditur. Et hac occasione mihi in memoriam revocavi hanc animadversionem, quam audiveram, imprimis a clar. HUNTERO. „Animi
„ deliquium, quod hæmorrhagias excipit,
„ nequaquam debere turbare adstantes, eos
„ que incitare, ut ægro stimulantia, v. c.
„ spiritum cornu cervi et cardiaca, offerant:
„ sed ut salutare considerandum esse; dum
„ videtur esse methodus a Natura adhibita,
„ qua sanguini tempus coagulandi præbeat.”
Quum hoc meæ suspicioni favere videretur,
experimentum instituere constitui.

EXPERIMENTUM XXI.

Huic scopo sufficere censens, si ad proprietates sanguinis attenderem, dum vario tempore fluit ex animali, cui ad mortem usque sanguis educitur; fora petii atque ad jugulationem ovium attendi; et sanguine vasculis

recepto meam opinionem vidi confirmatam. Observavi etenim, sanguinem, qui ex vasis mox, retracto cultro, fluebat, post duo circiter minuta cogi incipere; et sanguinem ferius eductum, vel quum animal magis debilitabatur, minori identidem tempore cogi; donec tandem, animali admodum debilitato, sanguis, licet plane fluidus e vasis efflueret, attamen vix vasculo receptus esset, antequam cogeretur. Experimentum etiam repetii, sanguine vario tempore variis vasculis recepto, dum animali ad mortem usque sanguis educebatur: et, licet tempus jugulando animali impensum vulgo duo minuta non excederet; attamen, vascula conferendo, sanguinem ultimum emissum primum cogi deprehendi (*). Observavi in-

(*) Necessè videtur memorare phenomenon; quod mihi in his experimentis repetendis occurrit: quod nempe, licet sanguis in ultimo vasculo, eductus animali valde debilitato, semper minori tempore cogeretur, quam in primo; attamen, quum quatuor vel quinque vascula ad-

insuper, sanguinem varia specie cogi, pro varia animalis debilitate; eum, qui remoto cultro mox succedit, intra duo circiter minuta cogi incipere; primum membranam five pelliculam in superficie formare, quæ sensim per omnem sanguinem extenditur, licet adeo tarde, ut ejus incrementum observari possit; præsertim si pellicula de tempore in tempus moveatur. Sanguis vero animali languenti detractus, momento citius, postquam cogi semel incepit, coactus est (b). Ex hoc phæ-

no-

adhiberentur, sanguis iis contentus non semper exacte in ratione inversa repletionis cogeretur: nonnunquam etenim secundus ante tertium cogeatur. Hoc phænomenon prima specie generali conclusioni contrarium apparebat: post diligentius autem examen, suspicio erat, deberi, luctationibus (sive temporario roboris vasorum exercitio) animalis, nec ulla differentia in ejus ad aërem friguse expositione observabatur.

(b) *Eadem experimenta variis temporibus repetendæ opportunitatem nactus fui. Lanioni etenim oves vitulosque jugulanti adstans, sanguinemque quinque pluribusve*

nomeno, quod sanguinis ad coagulandum diathesis augeatur, ubi animal debilitatur, conclusio non inutilis elici potest: circa hæmorrhagiarum constipationem; ne scilicet ægrum excitemus medicamentis stimulantibus, nec motu, sed illum languorem sive deliquium continuemus, quod huic scopo maxime inseruit; adeoque remedia, quæ his in casibus utilia videntur, talia esse, quæ corpus refrigerant, vim circulationis minuunt, illumque languorem, sive deliquium, augment (*). Quo magis enim

vasculis, varia subinde magnitudinis, ordine sæpius mutato, recipiens, sanguinem in ultimo duobus, sæpiusque pluribus minutis, citius cogi, quam in primo; licet tamen reliqua vasa non semper in ratione inversa repletionis coagulum exhibuerint; observavi. Primum emissæ sanguinis coagulum, striarum membranarumve forma, incipere et lente progredi; ultimum citius ferme momento cogi, pariter mihi constitit; ita ut ultimus sanguis jam ad venas contractus vasculo recipi negaverit.

(*) Præterquam, quod stimulantia et cardiaca contra ani-

enim hæc effecta producuntur, arteriæ divisæ tanto aptiores ad contractionem redduntur, et sanguis citius cogitur; quæ duo ad claudenda orificia, sanguinem emittentia, concurrere videntur (*). (c)

Quæ-

animi deliquium dentur, in variis Angliæ partibus mulieribus, fluore laborantibus, insignes vini Portuensis doses ea hypothesi, quod iis sua vi adstringente conducant, propinare solenne est. Revera autem, quia vires circulationis intendit, his in casibus minus tutum videtur. Multa forsân remedia, quæ styptica dicuntur, eadem de causa hic memorari merentur.

(*) Recentè per experimenta evictum fuit, præsertim per ea, quæ ingeniosus KIRKLAND instituit, majores arterias, ubi secantur, ita contrahi, ut hæmorrhagiam sistant. Majora vero coagula, quæ videmus in orificiis vasorum uterinorum illarum puerperarum, quæ cito post partum moriuntur, et obstipatio hæmorrhagiarum, ubi vasa sanguifera in lateribus rupta fuerunt, nec omnino divisâ, mihi persuadent, orificii sanguinem mittentis contractionem non unicam esse methodum hæmorrhagias sistendi, a Natura

Quæstio fuit, an venæ sectio apte in hæ-
morrhagiis commendari valeat, ubi manifesta
plethoræ signa non observantur. Nonne au-
tem hæc experimenta evincunt, venæ sectio-
nem apte institui posse, etiam absente pletho-
ræ, ut subita debilitas inducatur; qua impetus
sanguinis ita minuatur, et lymphæ ad coagu-
landum diathesis adeo augeatur, ut hæmorrha-
giam sistat? Quum enim consideremus, quam
cito vasa sanguifera contrahantur, et semet
quantitati sanguinis, quam continent, ada-
pcent, non improbabile videtur, nonnullis in

ca-

adhibitam. Ejus auxilia sane stupenda sunt, eaque di-
versa sæpe methodo eundem effectum producit.

(c) *Eadem etiam commoda præbent styptica varia,
externe applicata, v. c. alumen, spiritus vitrioli, spir.
Sulphuris p. c., cauteria, &c.; quæ, sanguinem coa-
gulando, et vasa irritando et constringendo, hæmor-
rhagias sistunt, et nequaquam rejicienda plurimis in cas-
bus videntur; ubi animi deliquium salutifero Naturæ
studio hæmorrhagiis non succedit, vel tantam debilitatem
expectare piaculum foret.*

casibus, ubi hæmorrhagia non larga est, sed diu continuata, robur ægri adeo posse refici, ut ad coagulandum diathesis non satis augeatur, vel extrema vasorum non satis contrahantur, ut hæmorrhagiam sistant. Sed, vasa cito evacuando hic scopus attingi, et hæmorrhagia sisti potest parciore sanguinis missione, quam contigisset, ubi tantum lenta evacuatio continuata fuisset.

Licet crusta alba, in morbis inflammatoriis toties obvia, adeo morbosam habeat faciem, ut nos compellere possit ad naturam ejus inflammatoriam agnoscendam, et sanguinem iteratis vicibus mittendum in omnibus illis casibus, in quibus occurrit; nos tamen sic male acturos credo: nam, ne de gravidis dicam, in quibus hoc phænomenon constanter observatur, pauci dantur Medici, quin observaverint agros, qui etiam talibus in casibus hac evacuatione in deterius recesserint. Neque miremur, hoc fieri posse, considerantes, quam cito in his

casibus hoc corium dispareat ; et, si hoc jam fiat, nonne supponere licet, illud etiam cito, vel brevi roboris vasorum exercitio, posse formari ? Hoc forte factum fuit in viro nobili, pag. 62. memorato, qui, nondum elapsis viginti quatuor post venæ sectionem horis, symptomatibus magnæ debilitatis laborabat.

Quum ex his experimentis constet, sanguinis ad coagulationem proclivitatem venæ sectione augeri, conduceret forsitan, si magis ad hoc attenderetur, et coagulatio sanguinis in ultimo, cum coagulatione in primo vasculo contenti conferretur, etiam in illis casibus, in quibus sanguis crusta phlogistica carere deprehenditur. Et pariter conveniret, ut eandem collectionem institueremus in iis casibus, ubi quodlibet vasculum crustam exhibet ; quod frequenter in morbis rheumaticis et phthilicis observatur. Hac ratione iudicium ferre licebit, quamnam efficaciam evacuatio in robur vel plenitudinem vasorum exseruerit ; et forsitan,

san, inspiciendo ultimum vasculum, præsertim si parvam tantum quantitatem contineat, proxime colligi poterit natura sanguinis, qui in corpore remanet. In morbo rheumatico, pag. 48. memorato, singula vascula hanc crustam continebant; et, licet sanguis in ultimo vase multo minori tempore cogéretur, quam in primo; quum tamen serius vulgo cogéretur, residuam in vasis partem eandem diathesin habere, suspicatus fui: æger vero, absque ut repeteretur evacuatio, sanatus fuit.

Hic memorare liceat, me semel vel bis observasse sanguinem, qui, ubi cogi incipiebat, in superficie pelliculam rubram, et sub ea fluidum pellucidum, habebat, quod postea crustam formabat. In his casibus, nisi pellicula rubra remota fuisset, antequam reliqua sanguinis portio coacta fuisset, nullam sanguinis partem ad hanc crustam albam formatam aptitudinem habere, concludi potuisset. Hoc phænomenon, me iudice, inde natum fuit, quod

quod sanguis in loco aëri contiguo coagulatus fuerit, antequam particulis rubris tempus concederetur, quo descenderent ex illa parte lymphæ, quæ imminutam ad coagulandum habebat diathesin.

Vir clarissimus DE HAEN notabile phænomenon in sanguine memoravit, cujus rationem dare non potuit; quod autem ex nonnullis supra memoratis experimentis explicari posse, conjicio. Observavit scilicet, „sanguinem, „homini febricitanti eductum, crusta phlogistica tectum, et crassamentum, in uno „vasculo examinatum, speciem facci, fluidum limpidum continentis, formasse. Hoc „fluidum emissum, appositumque vasculum proximo mane examinans, densissimam iterum crustam universim obductam, et ad „fundum vasis pertingentem, observavit” (*). Simile aliquando observavi phænomenon; sap-

(*) Vid. *Rat. Medendi Tom. I. pag. 105. seqq.*

sanguinem etenim, hora decima matutina detractum, et quatuor vasculis receptum, quinta pomeridiana examinans, serum in primo vasculo a crassamento non separatum observabam; sed crassamentum saccum, humorem continentem, quale clarissimus DE HÆN descripsit, referebat. Pressione adhibita, fluidum prorumpens, et per pauca minuta aëri expositum cogebatur. Illa tamen inter duos hos casus obtinebat differentia, quod in casu, a me observato, fluidum ruberet, ita ut crustam rubram priori albæ obduceret. Hoc jam attribuentum fuisse videtur sanguini, qui primum coagulabatur, ubi aëri et lateribus vasis erat contiguus; fluidumque prorumpens serum fuit, cum parte lymphæ coagulabilis, quæ adhuc fluida manserat, aëri vero exposita, pro more coacta fuit. Quamdam lymphæ partem fluidam manere posse, postquam alia coacta est, ex nonnullis supra memoratis experimentis constat; sanguinemque plus semel vidi, qui mox post venæ sectionem perfecte coactus videbatur; inciso

au-

autem coagulo, fluidum pellucidum emittebat, quod postea cogeatur. Atque adeo tarde hæc coagulatio subinde progreditur, ut in experimento supra relato pars sanguinis in corde canino tredecim post mortem horis non coacta fuerit observata. Distincte pariter observavi, nonnunquam, ubi durante evacuatione diathesis ad coagulandum multum immixta erat, sanguinem ad fundum vasis coactum fuisse, dum ad superficiem maxima corii pars adhuc fluida erat; tenui tantum pellicula ejus superficiem, aëri contiguam, tegente.

Aliud exemplum mutationis qualitatum hujus lymphæ coagulabilis, quod notabile videtur, apparuit nonnullis in experimentis; in quibus sanguinem aquæ et oleo immittendi mihi fuit occasio, tempore hyemali, quum calor aquæ et olei 41 gr. thermometri Fahrenheitiani non superarent. In omnibus his experimentis diathesin ad coagulandum imminutam, sanguinem magis magisque viscidum reperi:

non

non autem eo frigoris gradu coagulabatur.
Hæc experimenta mox memorabo.

EXPERIMENTUM XXII.

Jugularis cuniculi modo jugulati vena probe ligata, et porro exacta aquæ, calore 41 gr. æquanti, fuit immissa, eaque hinc elapso semihorioeductâ, sanguis adhuc fluidus reperiebatur, licet naturali facile viscidior; sed, postquam aëri erat expositus, cogeбatur.

EXPERIMENTUM. XXIII.

Duæ venæ jugularis canis recenter jugulati partes aquæ immittebantur, in qua thermometrum 41 gr. notabat. Altera elapsis viginti minutis educebatur, altera post tres horæ quadrantes: in utraque sanguis fluidus esse, et postea cogi observabatur. (d)

Quum

(d) *Hoc experimentum institui in vena jugulari canis
mox,*

Quum ex his experimentis pateret, aquam diathesin sanguinis ad coagulationem immi-
nuisse: porro inquisivi, cuinam aquæ facul-
tati hic effectus attribui valeat; utque vide-
rem, nonne aqua magis calida idem efficeret,
sequens institui experimentum.

EXPERIMENTUM XXIV.

Die decimo tertio Decembris duas partes
venæ jugularis alterius canis, mox post
mortem, excidi. Alterum segmentum aquæ
frigidæ, alterum immersum fuit aquæ, quæ
lampade calida fervata erat, ita ut calor
nunquam magis, quam inter gradus 90 et 100,
variaret. Lapsu trium horæ quadrantium,
vena aquæ calidæ immissa continebat coagu-
lum, pisum hortense magnitudine æquans; qui
vero

*mox post mortem, quam immisi aquæ, 45 gr. æquanti,
et per tres horæ quadrantes reliqui; quum secta emisit
sanguinem fluidum; postea coactum.*

Vero aquæ frigidæ immixtus erat, sanguis, in vasculum effusus, plane fluidus erat. Postquam per viginti minuta aëri expositus fuerat, sanguis, qui in aqua frigida detentus fuerat, cogebatur; quæ vero aquæ calidæ immixtus fuerat, neque tunc, neque postea ulla ulterioris coagulationis manifestabat indicia: adeo ut non tantum coactus fuisse videretur, dum aquæ calidæ immixtus erat, sed et a suo sero separari incepisse. (e) Ex hoc experimento probabile videtur, frigus eam fuisse aquæ qualitatem, cui diathesis ad coagulationem imminuta debebatur. Quo autem hac de re certior fierem, utque viderem, nonne sanguis diutius hac ratione fluidus servari possêt, sequens experimentum institui.

EX.

(e) *Idem experimentum bis, eodem cum eventu, institui, calore aquæ frigidæ 41 gr. æquante.*

EXPERIMENTUM XXV.

Die Januarii decimo quarto, partem venæ jugularis alterius canis excidi, eamque oleo immisi, 38 gr. thermometri notanti. Elapsis sex horis inde educebatur, et particulæ pleræque rubræ per venæ tunicas ad unum latus depositæ observabantur. Sanguis in vasculum mittebatur, et fluidus deprehendebatur; lapsu quindecim minutorum ultra dimidiam partem adhuc fluidus erat; intra minuta viginti quinque omnino coagulatus apparebat. (f) Quum jam similis hoc in experimento effectus fuerit, ac ubi vena aquæ immis-

(f) *Idem experimentum institui, eodem partim cum eventu, oleo calorem 44 gr. thermometri Fahrenheitiani æquante. Quum vero ad sanguinis, fluidi in vasculum emissi, insequentem coagulationem minus attendere licuisset, ob oleum simul vasculo illapsum; postea idem experimentum repetii, meliori cum successu, oleo calore 38 gr. æquante: ad emissi sanguinis perfectam coagulationem vix ultra quadrantem horæ requisitum fuisse observavi, dum*

coa-

missa fuit; frigus aquæ et olei lymphæ diathesin ad coagulandum imminuisse, probabile videtur.

EXPERIMENTUM XXVI (*).

Aliud ejusdem venæ segmentum aquæ fluviali immisi, quæ thermometri 38 gr. notabat, et ad proximum mane reliqui; quo tempore, elap-

coagulatio jam ad 10 minuta post editionem manifeste fieri inceperat.

(*) Hic memorare neesse est, magna velocitate in his experimentis esse utendum; exsecta enim vena paucis minutis post mortem animalis, experimentum succedere nequit, quia sanguis cogi incepit. (g)

(g) *Idem observavi; quæ causa fuit, cur, minus succedentibus nonnullis experimentis, primum cani mensæ affixo venas denudaverim, easdem a tela cellulosa separaverim, filaque submiserim, mox, istu caso vel jugulato canē, nodis constringenda: qua ratione postea melius successerunt.*

elapsis 22½ horis, inde eduxi. Particulæ rubræ non fidisse, ut in præcedenti experimento, observabantur; sed vena aperta sanguis fluidus repertus fuit, licet adeo viscidus, ut vix de vase stillare posset. Vâsculum, cui immissus erat, ad fenestram loco modice calido repositum fuit, et diligenter identidem fuit examinatum. Sanguis autem nullam unquam coagulationis speciem exhibebat; sed contra postridie, aquæ evaporatione, exsiccabatur. Hoc in experimento frigus lymphæ coagulationem omnino impedivisse videbatur. Tam lubrico nititur fundamento communis opinio, frigus sanguinem cogere.

Quum lympa refrigerata privata sit facultate coagulandi, ubi aëri exponitur; nonne hinc ducimur ad explicandam LISTERI observationem, sanguinem illorum animalium frigidorum, quæ per hyemem dormiunt, in pelvim emissum non cogi, et hinc, ut Idem notat, semper ad motum idoneum manere?

CA-

CAPUT IV.

*Ulteriores nonnullæ de lymp̃ha coagulabili, sub-
tisq̃ue ejus mutationibus, observationes.*

Lectori, si vulgari opinioni, sanguinis ad coagulandum diathesin in morbis inflammatoriis auctam esse, fidem habeat, ut mihi olim, valde anomalum forsã videbitur, contrarium obtinere; sanguinemque revera eo magis ad concrescendum esse dispositum, quo corpus debilius, sive actio vasorum magis sit imminuta. Quumque sponte veterum opinionum tenaces simus, nec libenter novas, nisi plene demonstratas, adoptemus; quemdam errorem hæc in experimenta irrepsisse, fortassis opinabitur. Et sane fateor, prima specie validum contra universalem meam conclusionem dari argumentum; nempe, quod non tantum observatum fuerit, primum vas crustam offerre, qua ultimum carebat; sed etiam

secundum tertiumve solum habere crustam, qua præcedentia carebant. Hoc, inquam, meo asserto contrarium videtur, sanguinis nempe ad coagulationem proclivitatem eo magis auctam esse, quo corpus debilius sit; hæc etenim quo plus sanguinis evacuatum esset, tanto minor ejus fuit ad coagulationem diathesis, siquidem magis coriaceus in secundo tertiove vase, quam in primo, fuit. Ut autem huic objectioni respondeam, notandum est, hoc rarissime fieri, et vulgo sanguinem prioribus vasculis contentum inprimis crusta tegi feriusque, quam reliquum, cogi. Sicubi vero contrarium obtineat, sive ubi secundum tertiumve vasculum corio magis insigne sit, quam præcedens; mihi persuadeo, illos rem attente considerantes, meam conclusionem nullatenus debilitaturos, sed revera corroboraturos; ut probabile videbitur ex sequenti casu, qui, post publicata hæc experimenta in *Transactionibus Philosophicis*, mihi occurrit.

EX-

EXPERIMENTUM XXVII.

Die decimo tertio Junii, juvenem adii an-
norum viginti duorumque, athleticum, vehe-
menti capitis dorſique dolore laborantem,
cum pulſu pleno et forti. Quum vero eo
tempore profuſo ſudore diſſluebat, quem hor-
ripilatio prægreſſa fuerat, ei ſanguinem mit-
tere non cenſui congruum; tanto magis,
quum ante biduum ſimili paroxyſmo illum cor-
reptum fuiſſe, intelligerem. Poſtridie vero
febrim ſudoremque illum non deſeruiſſe, illum-
que adhuc dolore capitis et dorſi correptum,
ejuſque pulſum, licet tunc non plenum for-
temque, attamen naturali celerioreſſe, in-
telligens, venæ ſectionem neceſſariam duxi.
Aperta vena, ſanguis tardiſſime fluebat, et
ſane tantummodo juxta brachium ſtillabat.
Fasciam nimis ſtriſſam forſan eſſe, ſuſpicans,
eam relaxavi, attamen ſanguinis motus non
accelerabatur. Tunc eum rogavi, num venæ

sectione territus fuisset; quod affirmabat: ejusque pulsum in altero brachio valde debilem deprehendi. Hinc illum musculos manus movere jussi, quod fecit; attamen sanguis adeo lente fluere pergebat, ut, antequam sesquiunciam vasculo recepissem, quatuor minuta elaberentur. Tunc orificium obturavi, donec aliud vas esset allatum, in quod sanguis pleno rivo effluebat, ad trium unciarum quantitatem, idque intra duo minuta, licet orificium parvum foret: tantum jam ejus velocitas increverat. In tertium vas, pariter tres uncias continens, sanguis celerius adhuc fluebat, ita ut minori, quam duorum minutorum, tempore repletum foret. Hoc tempore, ægro animi deliquium pati incipiente, sanguinis fluxum impediti, donec supinus in pavimento decumberet, et tunc ferme tres insuper drachmæ quarto vasculo recipiebantur; hæ tardissime effluebant, et hæmorrhagia sponte desinebat. Poculum aquæ bibebat, nec animo linquebatur, et postea evacuatione multum recre-

creatus videbatur. In hoc sanguine sequentia observavi.

Qui ultimum eductus erat, primum cogebatur, idque perfecte, intra tempus, quo brachium deligavi, nempe, trium minutorum post primum sanguinis in vas effluxum.

Sanguis primo vase receptus dein cogebatur, et juxta meum horologium intra duodecim minuta, postquam mensæ esset impositus.

Qui secundo vase erat receptus, tertium ordine, et multo serius cogebatur, quam qui primo erat receptus: intra quindecim enim minuta nondum perfecte coactus erat; immo post viginti duo minuta parva ejus portio adhuc fluida erat. Nullam harum trium portionum corio obductam esse, erat notabile.

Sanguis autem tertio vase receptus a fan-

F 5

gui-

guine reliquis recepto insigniter differebat; intra quinque etenim minuta ejus superficies pellucere incipiebat, quod futurum corium denotabat, et serius cogeбatur, quam in reliquis vasculis; elapsis etenim viginti sex minutis magna lymphæ coagulabilis pars adhuc fluida erat, ut apparebat, remota pellicula ei obducta; intra triginta quinque autem minuta perfecte coactus erat. Corium in hoc sanguine valde spissum lentumque erat.

Hic jam casus, si attente consideretur, meas potius, me judice, conclusiones valde confirmabit, quam iis opponi valebit.

Primo etenim, quum crustam in tertio vase solo sanguis exhiberet, et multo serius cogeretur, quam in reliquis; hoc meam conclusionem confirmabat, sanguinis nempe ad coagulandum diathesin, ubi crusta phlogistica five corium apparet, imminutam esse. Quumque sanguis velocius in hoc vas flueret, cor
et

et vasa sanguifera majori vi agi incepisse, indicabat; adeoque opinionem, quo hæc fortius agant, tanto magis lymphæ ad coagulandum diathesin imminutam esse, adstruebat. Eadem pariter opinio firmatur observando, quid sanguini in primo vase acciderit; qui citius coactus fuit quam ille, qui tertio continebatur, quia vasa tunc debilius agebant, ut ex sanguine juxta brachium destillante, et ex debili pulsu manifestum erat (*).

Se-

(*) Similiter explicari potest alia varietas in præsentia corii; ubi nempe in primo et ultimo vase, non autem in altero tertiove, reperitur. Hoc raro fieri opinor: ubi vero fit, forsitan observari poterit, vasa debilius egisse, dum secundum tertiumve vasculum repletum fuit. Hoc etenim corium adeo facile removeri vel formari videtur, ut opiner nonnunquam fieri, ut, quum sanguis pleno rivo ex amplo orificio educatur, æger tam cito debilitetur, et proinde qualitates sanguinis ita mutantur intra tempus, quo alterum vas repletur, ut corium dispareat; et tamen vasa postea priorem tonum recipiant, ita ut tertium quartumve vasculum iterum corium exhibeant. Quin immo
suspi-

• Secundo. Notari potest, difficillime conclusionem in priori hujus libelli parte factam (scilicet defectum corii in ultimo vasculo vasorum sanguiferorum mutationi deberi) admittere; quia difficulter intelligitur, quomodo hæc vasa lymphæ qualitates immutare valeant tam brevi tempore, quam quod inter sanguinem primo sanguinemque ultimo vasculo receptum intercessit. Hic autem casus hanc conclusionem confirmat, siquidem rem ulterius illustrat: hic enim etiam, ubi corium evanuit, constitit, sanguinem crusta sive corio obductum serius cogi; eumque esse, quem vasa fortius agentia emisserunt; ut ex celeritate, qua in vasculum fluxit, patuit.

Tertio. Dum tempus, intra quod sanguis in
his

suspicio, hoc phænomenon etiam a pathematibus mutari; præsertim si consideremus, ægrum supra dictum, æque ac alios, quorum sanguis primum juxta brachia stillabat, lanceola multum territum fuisse.

his vasis cogebatur, adeo differebat, (in primo enim intra duodecim, in altero intra viginti duo circiter, in tertio intra triginta quinque, et in quarto minori, quam trium minorum, tempore fuit coactus; licet singula vasa citius, quam duobus minutis, repleta forent); patet, quam cito ille vasorum sanguiferorum status, cui corium debetur, removeri et assumi valeat; ideoque nos ducit ad concludendum, licet hoc corium vulgo inflammationem denotet, sive fortem vasorum actionem, varias tamen circumstantias considerandas esse, antequam ex hujus præsentia absentiave iudicium feramus, an venæ sectio repeti debeat, an secus. Pariter evidenter docet, minus recte ex sola hujus præsentia determinari, an venæ sectio requiratur: et tamen non pauci fuerunt, quibus, quia hanc crustam coriumve phænomenon summopere morbosum agnovērunt, talem conclusionem elicere placuit.

Quarto. Quum sanguis, tertio vase receptus,
tri-

triginta quinque demum minutorum tractu cogeretur, et crusta obduceretur; dum sanguis quarto contentus hac caruit, et minori, quam trium minutorum, tempore coactus fuit; licet duobus tantum post tertium minutis vasis educus fuerit, sed eo, quo æger deliquium patiebatur, tempore: evincit, quantum animi deliquium et languor sanguinis visciditatem, atque ejusdem in coagulationem nisum augeant, quum intra duo minuta tantam mutationem produxerint, ut corium removerint, et coagulationis tempus a triginta quinque ad tria minuta reduxerint. (h) Hoc itaque

(h) *Certe argumenta, hic ab Auctore prolata, egregie ejus sententiam probant; a vasorum nempe actione pulsa imminui, ab imminuta augeri sanguinis in coagulationem nisum. Ejusque observata, lympham sanguinis, ubi crusta apparet, semper insigniter vasorum actione attenuatam esse, et serius cogi, evincunt. Non tamen semper sanguinis attenuationem imminutam ejusdem ad coagulandum diathesin comitari, insuper patebit. Adeoque ex absentia corii in sanguine hominis exercitati nullo*

ju-

que manifesto evincit, quantum languor et animi deliquium in hæmorrhagiis promoveri de-

jure contra HEWSONI sententiam concludit HAMILTON; dum Auctor tantum denotat, ubi crusta adest, eam ab attenuata per vasorum actionem lymphæ nasci. Vid. interim doct. Hamilton diff. cit. pag. 35. seqq. Dum autem hic de vasorum actione loquitur clar. HEWSONUS, illum de solo systemate arterioso hic agere, nulla videtur credendi ratio: quod tamen censere videtur doct. HENDY; qui ceterum cum HEWSONO, proprietates lymphæ coagulabilis a mutata vasorum actione, mutari credit. Vid. Essay on Glandular secretion pag. 13. Nec est, quod HEWSONI sententiam in dubium vocemus; siquidem a systematis nervæi influxu vasorum actionem dependere, et hæc de causâ vasculosum systema ab animi affectibus, vel reprimentibus, vel excitantibus, vario modo affici, et sanguinis naturam varie mutari, eandem probabiliter ob causam, constat: dum insuper a diversa vasorum secretoriorum actione diversas secretiones, diversasque fluidi secernendi qualitatem et quantitatem; immo ipsum pus variasque ejus qualitates hinc nasci, probabile reddidit modo dictus HENDY diff. cit. Sect. III. Conf. GREGORY l. c. §. 699, nec non HEWSONI Descript. Syst. Lymph. pag. 93. seqq. Hæc cer-

debeant, et quanta cura cavendum fit, ne quidquam, quod ægrum stimulare, vel excitare valeat, propinemus; medicamenta probabiliter utilia esse nitrum et acida; vel talia, quæ corpus refrigerent, vel vim circulationis minuendi, aut illum languorem deliquiumve augendi facultate gaudeant (*); omnem ani-

mi

te opinio magis probabilis est, quam, crustæ præsentiam lymphæ sanguinis, ex morbo systematis statu, partibus nutrimentum desiderantibus applicari nequeunt, et hinc in massa circumventum humorum defentæ, deberi; quæ conjectura est doct. HAMILTON l. c. p. 34. seqq.

(*) Objectum fuit, nitrum huic scopo incongruum videri, quia in experimentis supra (pag. 14.) memoratis, sanguinis coagulationem, extra corpus, eo impediri fuit observatum. Hæc autem objectio refutatur, considerando, nitrum, ut coagulationem impediat, duorum saltem scrupulorum dosi ad singulas duas sanguinis uncias adhibendum esse. Quum autem illud interne exhibeamus, raro ultra scrupulum quovis biotio damus; quæ quantitas nullam vim habebit in totam sanguinis massam attenuandam, neque in coagulationem impediendam; præsertim,

quum

mi agitationem quantumpote vitandam, ne circulationem intendat; omnem motum muscularem eadem de causa cavendum: roboris etenim ægri exercitium sanguinis ad coagulationem proclivitatem minuere posse, mihi ex nonnullis casibus supra memoratis constat; nec non ex iis, quæ observavi in ovibus moribundis, ubi animalis animam efflantis luctationes subinde, ubi vehementes erant, lymphæ qualitates mutareprehendebantur. (i)

Præ-

quum ratio sit credendi, ejus facultates mutatas esse, antequam organa digestionis transeat. Usus ejus in hæmorrhagiis proinde ejus in ventriculum actioni deberi videntur. Ut ejus utilitas pateat, vid. *Medical Observations and Inquiries. Vol. IV. Art. XVI.*

(i) *Quantum profit in hæmorrhagiis animi deliquium, docet observatio, a SWIETENIO in Comment. ad Aphor. BOERH. §. 161. Tom. I. pag. 235. memorata de rustico; qui, inter pocula cultro sub axilla vulneratus, discissa arteria axillari, et incredibili impetu exsistente sanguine, concidens, pro mortuo departabatur. Postridie vero,*

G

ubi

Præsentiam crustæ phlogisticæ, sive corii, ex globulis rubris a superficie talis sanguinis nondum coacti descendentibus, explicare conati sumus: hoc partim lymphæ, his in casibus ferius coactæ, sed imprimis ejus attenuationi, deberi notavimus. Jam autem addere licet, quamvis lymphæ attenuatio ejusque imminutus in coagulationem nifus in plerisque his casibus jungantur, non tamen semper jungi: lymp̃ha etenim diathesin ad coagulandum imminutam habere potest, absque eo ut attenuata sit. Hoc in præcedenti casu manifestum fuit, con-

ubi corpus examinabatur, hoc calidum adhuc invenerunt; et, per aliquot horas sibi relictus, sensim resocillabatur et, diu in summa hac debilitate manens, tandem evasit vulneratus. — Quantum vero noceat ægris tali in casu stimulantia dare, docet BOERHAVII observatio; qui Studiosum, cui arteria vertebralis abscissa erat, quique animi deliquium patiebatur, situ horizontali et tenui carniū juscūlo per novem decemve dies vivum servavit: qui tamen æger, datis, illo invito, cardiacis stimulantibus, mortuus est. Vid. Comment. in Aphor. propr. Tom. I. pag. 245,

conferendo sanguinem secundo, cum sanguine tertio vase contento : sanguis enim secundo vase contentus crusta carebat, licet decem ad minimum minuta, postquam crusta in tertio apparere cœperat, fluidus maneret; quod sanguini, qui tertio vase continebatur, magis attenuato, adeoque globulis citius transmissis, tribuo.

Sanguinis ad coagulandum diathesin minui posse, absque eo ut attenuetur, ex sequentibus pariter casibus probabile est. •

EXPERIMENTUM XXVIII.

Mense Januario venam secui viro cephalgia laboranti, cum vertigine et horripilatione, dolore et ægritudine ventriculi, pulsuque pleno et celeri : sanguis decem minuta fluidus manere observabatur, et deinde coagulabatur, nullam vero crustam exhibebat.

G 2

EX.

EXPERIMENTUM XXIX.

Alii sanguis solam ob somnolentiam mittebatur, et, quia huic evacuationi tempore vernali assuetus erat; eumque septem minuta citra coagulationem fluidum manere observabam, et tamen corio non erat obductus.

Quum jam his in casibus sanguis tamdiu fluidus manserit, nec tamen particulæ rubræ descenderint, nec corium apparuerit; facile concluderim, lymphæ ad coagulationem nisum solummodo imminutum fuisse, absque eo, ut attenuata fuerit. Ex ultimo casu pariter concludere licet, quàmvis tempus, quo sanguis hominibus sanis eductus cogi incipit, trium circiter minutorum cum dimidio ponatur, ut mihi ex repetitis observationibus constitit; aliquam tamen differentiam hoc respectu dari posse: plethora enim aliæque circumstantiæ, ut subinde ferius cogatur, efficere possunt,

sunt, etiam, ubi cæterum æger perfecte sanus est. (*)

Antea notavimus, corium subinde densissimum esse, alias spongiosum et cellulare. Has densitatis differentias in ratione attenuationis sanguinis, minutique ejus in coagulationem nisus esse, suspicor. Quum enim in superficie cogi incipiat, ibique membranam formet, quæ reliquum lymphæ attrahit; quò magis lymphæ attenuetur tardiusque cogatur, eo magis membrana illam a rubris globulis seroque separare poterit. Hinc forsan fit, ut, ubi sanguis, non tantum tenuissimus est, sed et tarde coagulatur, nonnunquam omnem lympham in superficie collectam, firmam crustam formantem, observemus; quæ, a sero globulisque rubris separata, superficiem in formam

(*) Hæc conclusio casu infra, Experimento XXXII, memorato confirmatur.

nam concavam contrahit. Quum autem sanguinis diathesis ad coagulandum parum immunita est, in ratione attenuationis: tunc, licet globuli rubri a superficie in fundum descendant, omnis tamen lymp̄ha tam cito cogitur, postquam cogi incepit, ut tempus ei non concedatur, quo a sero separētur; cujus proinde insignem copiam continet, et hinc spongiosa et cellularis est.

Placentæ basis, pro ratione densitatis et crassitiei crustæ, minus firma est: hæc autem laxior fabrica non putrefactioni, ut suspicati fuerunt nonnulli; sed unice lymp̄hæ in superficie collectæ, adeoque infimam crassamenti partem deferenti, debetur.

Licet venæ sectio vulgo actionem vasorum debilitet, sanguinis ad coagulandum diathesin augeat, lymphamque inspisset: fieri tamen potest, ut, solita quantitate, qua sanguis mittitur, nulli horum effectuum produ-

ducantur; quod sequens casus docere videtur. (k)

EXPERIMENTUM XXX.

Mulieri septimo graviditatis mense sanguis mittebatur, ob vehementem lateris dolorem, cum tussi. Quantitas sanguiniseducti erat octo unciarum, quæ quatuor vasculis recipiebantur; quumque orificium parvum foret, decem circiter minuta sanguinis missioni impendebantur. Ad varia vascula attendens, nullam diversitatem observare potui in periodis, quibus coagulatio in quolibet incipiebat, vel absolvebatur; ratione habita temporis, quo sanguis in quodlibet vasculum influere incipiebat.

(k) Adeoque conclusio, a doct. HAMILTON l. c. pag. 37 prolata, e simplici experimento elicitæ, venæ sectionem nempe, saltem non magnam, vix notabiles exserere effectus in pulsus velocitate vel vi minuenda, nil contra HEWSONI observata facit.

bat. In singulis his vasculis sanguis intra viginti circiter minuta perfecte coactus erat, et singula crustam coriumve ejusdem ferme crassitie exhibebant. Adeoque venæ sectio robur vasorum ægræ nullatenus mutasse videbatur; nec eâ dolor sensibiliter minutus erat. Ideo sobrie vivere, semet diætæ vegetabili addicere, et quolibet trihorio cum haustu decocti pectoralis scrupulum nitri assumere et, si dolor et tussis intra biduum non decreverent, venæ sectionem repetere jubebatur. Quum sedula attentio non requireretur, illam non, nisi post elapsum quatrimum, visitavi; quum morbo libera erat, licet sanguis tam parum intra evacuationis tempus ad speciem mutatus fuisset.

Hoc in casu sanguinis missio lympham neque inspissasse, neque ejusdem ad coagulationem diathesin auxisse, neque actionem vasorum debilitasse videbatur: quin autem tantum non semper hos effectus producat, me judi-

dice, dubitari nequit; quum illud tot exemplis nobis constiterit. Forſan metus operationis hic efficere pôtuit, ut ſanguinis coagulatione in primo vaſculo ad coagulationem in ultimo propius accederet; vel forſan orificii exilitas impedivit, quo minus hic adeo manifeſta mutatio per evacuationem producta fuerit; quia vaſis ſanguiferis tempus conceſſit ſemet magis æqualiter accommodandi copię contentæ; qua ratione per jacturam ſanguinis ægra non fuit debilitata.

A SYDENHAMIO aliisque aliquando fieri notatum eſt, etiam in morbis inflammatoriis; ubi ſanguis juxta brachium ſtillat, non vero pleno rivo fluit, ut cruſtam ſive corium non recipiat. (*) Nonne hoc exponi poteſt ex iis, quæ

(*) Neeſſe eſt, ut memorem, non ſemper, ubi ſanguis juxta brachium ſtillat, eum cruſta carere: contra nonnunquam fit, etiam hiſ in caſibus, ut denſiſſima cruſta obducatur; cujus rei exemplum infra, in experimento XXXI; ap-

quæ in Experimento XXVII observata sunt? scilicet, talibus in casibus vasa, per febrilem sive aliam oppressionem, debilius agunt, quam in inflammationibus solent; qua methodo lymphæ non satis attenuatur, ut globulorum rubrorum subsidentiam admittat, antequam cogi incipiat: ideoque corium non apparet, ut quidem in aliis inflammationibus, ubi talis oppressio non adest.

Quum, aërem sanguinem cogere, frigusque eum inspissare, observatum fuerit; hinc objectio
ad-
parebit. His in casibus destillatio juxta brachium forsan debetur cuidam circumstantiæ in orificio, quæ impediat, quo minus pleno rivo effluat; vel diversæ fasciæ constrictioni, potius, quam debili vasorum actioni. Sive, licet corium a forti actione, (sive singulari quadam agendi ratione,) vasorum nascatur, et proinde ea debilitando removeatur; non tamen semper hac debilitatione protinus removeri valet: fieri enim potest, ut lymphæ subinde mutationibus non adeo pateat, ac soleat; sive, quum valde attenuata est, non iterum mox, ubi vasa debiliter agunt, inspissari valeat.

adversus conclusiones e nonnullis superiorum experimentorum elicita mota fuit, et positum, mutationes qualitatum sanguinis, quæ durante sanguinis missione contingunt, (quas diversæ vasorum actioni tribui), soli forsan aëris frigorisve applicationi diversæ deberi. Exempli gratia, quum sanguis, qui juxta brachium stillat, magis refrigeratas videatur quam ille, qui pleno fluit rivo: hinc positum fuit, defectum corii his in casibus forsan deberi aëri accedenti, qui efficiat, ut citius cogatur; et frigori illum inspissanti, hincque impediendi, quo minus particulae ejus rubrae sidant, ita ut corium formetur. Hæc sane obiectio probabilis videtur, illisque, qui his experimentis nunquam adstiterunt, prima forsan facie hunc phænomeno explicando satisfacere videbitur; ad ulterius vero examen non plenariè satisfacere deprehendetur. Ita, verbi causa, licet verum sit, aërem sanguinem cogere, eumque pariter refrigerare; notata tamen in superioribus experimentis sunt mutationes, quæ per solam in aëris admissione dif-

differentiam explicari nequeunt. Ita, in experimento XXVII, sanguis in tertio vase triginta quinque minutis ad perfectam coagulationem indigebat; dum sanguis, qui quarto continebatur, licet duobus tantum minutis ferius e brachio missus, intra tria tamen minuta coagulabatur. Talem autem mutationem nec aëris, nec frigoris applicatio, per sanguinis juxta brachium destillationem, producere poterat. Hoc mihi persuasum est ex eo, quod observavi, conferendo sanguinem vasculo receptum cum eo, qui stillaverat in tabulam, cui vasculum erat impositum: iteratis enim vicibus observavi, his in casibus sanguinem in tabulam immissum, licet tanto magis refrigeratum, tantoque magis aëri expositum, quam qui vasculo continebatur, nequaquam tamen citius, sed ferius hoc cogi. Hoc sequens experimentum liquido evincit.

EXPERIMENTUM XXXI.

Fœminæ juveni, vehementi ophthalmia laboran-

rantī, die quinto Martii, sanguis bene mane
educebatur, antequam jentaculum sumserat;
quia morbo ventriculi laborabat. Sanguis,
educta lanceola, pleno rivo fluebat, sed mox
tantum juxta brachium stillabat, et hac ra-
tione per totum evacuationis tempus pergebat.
Octo circiter sanguinis unciae quatuor vasis
recipiebantur; duobus nempe vasculis duo-
busque catillis, sequenti ratione. Tabula, va-
sculum catillumque continens, brachio suppo-
nebatur; et sanguis primum catillo, ad co-
chlearis quantitatem; tunc paullo plus vasculo
apposito recipiebatur; dein iterum sanguis in
catillum immittebatur, postea in vasculum; id-
que alternatim, donec singula duas ferme un-
cias continerent. Hoc facto, caute reponen-
tur ad fenestram; ubi thermometer 57 gr.
notabat: tabula juxta illa locabatur, et
cochlear ferme sanguinis continebat, qui ca-
tillum initio evacuationis evaserat. Porro al-
tera tabula afferebatur et sanguinis nonnihil
primum vasculo et dein catillo recipiebatur, ea-
dem

dem ratione; et tres portiones sanguinis diversis temporibus in tabulam guttatim demittebantur, singulis denarium (*a shilling*) latia. Hic jam, secundum objectiones, adversus nonnulla superiorum experimentorum prolatas, sanguis in catillis, duplo ferme majorem superficiem habens, quam sanguis in vascula immissus, intra dimidum tempus; quique in tabulis erat, ob magnam superficiem, tempore multo minori cogi debuisset: sed contrarium accidit; sanguis enim in vasculis primum perfecte fuit coagulatus, porro in catillis, et omnium ultimum qui in tabulas erat immisus. Quum vero experimentum notabile sit; expedire videtur, ut magis speciatim, quid observatum fuerit, exponam.

Ad tabulam primam attendens, elapsis septem minutis, postquam ad fenestram effecta posita, superficies sanguinis in vasculo insigniter pellucebat, et pellicula, (id est, superficie cogi incipiente) erat obducta: nulla vero pellaci-

di-

ditas apparebat in sanguine catillo contento, neque ullam pelliculam acicula pertusus exhibebat; neque etiam ille, qui in tabulam stillaverat, sanguis. Elapsis quindecim minutis, sanguis vasculo et catillo contentus plurimum coactus, sive densa pellicula obductus erat; dum nulla adhuc crusta in sanguine in tabulam immisso apparebat. Elapsis quinquaginta quinque minutis, sanguis vasculo contentus a fero separari incipiebat; dum in catillo sanguis nondum plene coactus erat: hoc enim in latus inclinato, sanguinis pars sub pellicula fluida apparebat. Sanguis in tabulam demissus jam coactus erat. Singulæ tres portiones corium manifestabant: sanguisque catillo receptus crusta obductus erat, quæ ferme æque firma et magna videbatur, ac illa, quæ in vasculo conspiciebatur; et corium, sanguini in tabulam immisso obductum, satis crassum erat, ut facile discerneretur.

In altera tabula, elapsis septem minutis postquam

quam ad fenestram reposita erat, sanguis, tam vase, quam catillo contentus, cogi incipiebat; et pellicula insignis crassitie tegebatur, et uterque corium manifestabat. Nullam autem pelliculam exhibebant tres portiones in tabulam demissæ. Elapsis quindecim minutis, sanguis vasculo contentus firmiter erat coactus; qui catillo continebatur, non adeo perfecte; et una e maculis tabulæ immixtis eo ipso tempore ad marginem cogi incipiebat. Elapsis viginti quinque minutis, duæ ultimæ maculæ adhucdum perfecte erant fluidæ: sed intra viginti octo minuta cogi incipiebant; dum sanguis vasculo contentus a suo sero jam separabatur. Elapsis quinquaginta minutis, insignis seri copia in vasculo separata erat; et separatio in catillo eo ipso tempore fieri incipiebat.

Hoc experimentum post biduum in alio sanguine humano repetii, coram dominis FIELD et HENDY, Medicinæ studiosis, tunc in no-
foco-

Locomio Middelsexico degentibus, et phænomena perfecte congruebant; iisque patebat, sanguinem in catillis serius, quam in vasculis, et in tabulis, (quarum una stannea erat,) multo adhuc serius cogi.

Hæc proinde experimenta luculenter ostendunt, differentiam inter coagulationis periodos, et inter crustas sanguinis, variis vasculis e vena secta recepti, differentiae in expositione ad aërem tribui non posse: sanguis enim hoc in casu aëri magis expositus, quam ille, qui juxta brachium stillat, æquali crusta obduci, et serius cogi, quam ille, qui aëri minus exponitur, deprehensus fuit.

Quum novum quid hic observaverimus, quod notabile et primo intuitu nonnullis nostrarum conclusionum contrarium videtur; opus erit, ut illud ulterius examinemus, et inquiramus, si aër cogat sanguinem, (quod in initio hujus tractatus probare conati fuimus,)

H

cur

cur hoc in experimento non coactus fuerit pro ratione aëris admissi? Hoc exponi posse opinor, considerando aliam observationem supra memoratam, frigus scilicet minuere sanguinis ad coagulandum diathesin. Sanguis igitur, catillo receptus, licet aëri magis expositus, attamen magis refrigeratus, quam sanguis, qui vasculo continebatur, hanc ob causam ferius cogebatur; ideoque sanguis in tabulam demissus, aëri plurimum expositus et plurimum refrigeratus, ultimum cogebatur.

Quamvis autem ex hoc experimento pateat, differentiam aëris admissi frigorisve non sufficere exponendis mutationibus, quas videmus produci in sanguine, intra breve tempus, quo vasculum parvum repletur; præsertim, ubi hæ mutationes tantæ sunt, quantæ in Experimento XXVII, (ubi sanguis in uno vasculo per triginta quinque minuta cogebatur et corio densissimo obductus erat; dum sanguis, brevi post emissus, intra tria minuta cogebatur

tur corioque carebat): opinor tamen, aëris frigorisve effectus satis insignes esse, ut notari mereantur in nonnullis casibus, in quibus mutationes tantas sanguis non subit. Quum enim frigus sanguinem inspisset; probabile est, nonnullis in casibus, ubi lymphæ parum tantum est attenuata, (et ubi proinde, sanguinem, solita ratione missum, minima tantum crusta obduci, apparituum fuisse,) in tali sanguine, si magis aëri expositus fuerit, ita ut citius refrigeretur, parvum hinc attenuationis gradum destructum sive remotum, et impeditum iri, quo minus particulae rubrae fidant. Ita ut; licet hoc in experimento, ubi crusta densa erat, hæc æque in catillo, ac in vasculo adesset, similisque appareret in sanguine in tabulam immisso; attamen, si hæc experimenta in variis ægris repetamus, nos subinde catillum crusta carentem reperturos, dum vasculum eam exhibet, probabile fit: quum enim lymphæ parum tantum attenuata est, levi de causa iterum inspissari potest; eaque in

catillo et tabula paullo magis refrigerata subinde crustæ formationi impediendæ sufficere potest.

Suggestum pariter fuit, ex quadam forsitan orificii, per quod sanguis fluxit, differentia variam ejus in variis vasculis formam enatam fuisse. Nullo autem fundamento hæc objectio niti videtur, eamque refutari posse credo, nonnullis tantum horum experimentorum, nominatim vigesimo septimo, diligentius examinatis: in hoc enim sanguis pleno rivo in secundum tertiumque vasculum fluebat, orificio probabiliter non mutato, et tamen magna in forma sanguinis aderat diversitas: in tertio enim vasculo crassum corium, in secundo nullum apparebat. Ita ut nil in his experimentis adsit, quod plenarie exponat mutationes sanguini, durante venæ sectione, inductas; nisi, cui has attribui, mutata vis vasorum sanguiferorum eorundemve agendi modus; et singulæ, quas porro institui, observationes meam opinionem confirmarunt.

Præ-

Præclarus Medicus (*), parata prima hujus libelli editione, mihi retulit, se ex observatione in clarissimi SIMSONII dissertationibus obvia, scilicet „ligaturam brachii corium producere” (†), variis annis cautum fuisse in ulla indicatione ex hoc phænomeno in sanguine obvio formanda: et rogabat, ut experimento definire conarer, nonne ligatura diutius breviusve brachio circumjecta, etiam in solita sanguinem mittendi methodo, aliquid ad hoc phænomenon conferret. Et hunc in finem, coram doct. DRUMMOND, Dominis FIELD, HENDY et COCKSON, sequens experimentum institui.

EX-

(*) Doct. FOTHERGILL.

(†) Notavit doct. SIMSONIUS, si ligatura arcte membro circumdetur, et vena post trihorium aperiatur, corium productum iri. — Vide *De Re Medica, Dissert. III. Sect. 38. p. 112.*

EXPERIMENTUM XXXII.

Die nono Octobris, utrumque brachium juvenis sani ligavi, et ligaturam ita constrinxi, ut venæ turgescerent, pulsu libero manente. Vena alterius brachii, facta deligatione, protinus aperiebatur, et uncia sanguinis vasculo recipiebatur. Tam exilem copiam emittere placebat, quo minus, per corporis debilitationem sanguinem ullam mutationem subiisse, probabile foret. Ligatura alteri brachio per horam erat circumjecta, quæ venas valde turgidas reddebat, simulque juvenem rigore cubiti afficiebat; arteriâ in carpo constanter perceptâ, licet minus distincte, quam in altero brachio non deligato. Elapsa hora hæc vena amplo vulnere aperiebatur, et una sanguinis uncia emittebatur. Diligenter ad quodlibet vasculum attendenti, mihi ligatura aliquam mutationem produxisse videbatur: primo enim, sanguis, tamdiu in brachio ligatura detentus, obscurioris erat coloris, sive nigricantis; dum

san-

sanguis ex altero brachio missus lætioris coloris erat, etiam quum primum e vena fluebat. Secundo, sanguis, tamdiu in brachio detentus, serius cogeatur: non etenim a fero separari incipiebat ante elapsa triginta septem a venæ sectione minuta; dum in altero intra triginta minuta coagulatio perfecta erat, ferumque effluere incipiebat. Tertio, sanguis primum emissus crusta carebat; dum ille, qui tamdiu in altero brachio fuerat detentus, parvam habebat maculam magnitudinis denarii argentei, quæ ne vigesimam quidem superficiem tegebat.

Ex hoc itaque experimento, ligatura diu injecta corium producere posse, secundum doct. SIMSONII observationem, videtur: tunc autem probabiliter parva tantum quantitate aderit.

Idem Vir eruditus, de eventu hujus experimenti monitus, ingeniose suggestit, copiam

sanguinis, quam emiseram, forsan nimis parvam fuisse, quam ut experimentum redderet apodicticum: quum enim una tantum sanguinis uncia ex utroque brachio educta fuerit; omnem illum sanguinem in ipsis venis contentum fuisse, poni posse: quumque probabilius esset, diathesin ad coagulandum in arteriis locum habere; majorem quantitatem emittendam fuisse, ut judicium ferretur, an sanguis in arteriis non mutatus fuerit, venis brachii tamdiu compressis. Experimentum ideo in eodem homine, septimo Martii, repetitum fuit, coram Dominis FIELD et HENDY, ut antea; et sequentia observavimus.

EXPERIMENTUM XXXIII.

Sanguis, e brachio primum aperto ad decem ferme drachmas emissus, crusta carebat; sed coagulatio tarde perficiebatur. Pellicula in superficie sex demum post apertam venam minutis apparebat, elapsisque quindecim mi-
nu-

nutis insignis sanguinis copia adhuc fluida erat; sed intra minuta triginta quatuor totus quantus coactus erat. Serum elapsis minutis quinquaginta nondum effluere incipiebat.

Altero brachio per horam ligato, vena aperta fuit, & decem circiter drachmæ sanguinis in primum vasculum immissæ, paullo plus in alterum, & sesquiuncia circiter in tabulam stanneam, duæque circiter unciae cum semisse in tertium vas; (in universum sex unciae cum semisse;) & observatum fuit, sanguinem tertio & secundo vase contentum intra viginti circiter minuta cogi, serumque viginti quinque post venæ sectionem minutis exire: sanguis in tabula serius cogeatur, & nulla harum sanguinis portionum vel minimum crustæ habebat indicium. Sanguis vero in primo vase omnium postremum cogeatur: elapsis etenim viginti quinque minutis, magna adhuc quantitas sub pellicula fluida erat, lapsisque quinquaginta, coagulatio imperfecta erat.

Hic sanguis paullo majori crusta obductus videbatur, quam in experimento præcedenti; hæc autem non in una parte colligebatur, sed per superficiem diffusa erat, macularumque capite aciculæ non majorum formâ aderat.

Eventus itaque hujus experimenti similis fuit præcedenti. Ligatura diu continuata crustam produxit, sed parva quantitate: adeoque non probabile videtur, quum ligatura per pauca tantum minuta brachio circumjecta fuit, (ut fit in solita sanguinem mittendi ratione;) eam attentionem mereri, ubi de morbo, sive de indicationibus curatorii ex crustæ præsentia judicium ferimus: præsertim, quum confidetur, sanguinem, in quo hæc experimenta instituta sunt, doct. SIMSONII opinioni plurimum favisse; eductus scilicet erat ægro, qui plethoricus videbatur; siquidem sanguis primus missus non minori tempore, quam triginta et triginta quatuor minutorum, cogeatur, quod solito ferius erat; ut constet ex iis, quæ
fu-

supra (pag. 46;) notata sunt ubi, sanguinem homininis sani vulgo intra septem octove minuta cogi, notavimus.

Multa horum experimentorum quum evincant, quam facile lymphæ ad coagulandum diathesis mutari valeat, per exiles etiam, ut videtur, vasorum sanguiferorum mutationes; conducunt ad explicandum, unde fiat, ut sanguis nonnullis in morbis hac coagulandi facultate destitui videatur. Hujus rei exemplum doct. DE SENAC (*) memoravit, aliud a clar. CULLENIO observatum fuit, tertiumque nuper ipse observavi, doct. HUCK, & Medicorum, Britannico nosocomio præfectorum, favore; qui, sanguinem ex secta fæminæ, mox post partum febris correptæ, vena editum, aëri expositum, non cogi, sed mixturæ e sero globulisque rubris tantum conflatae similem observarunt, globulis rubris pulveris instar fun-

(*) *Traité du Cœur*, Tom. 2, p. 129.

fundum petentibus. Triduo post mortua fuit, apertoque cadavere, sanguinem in vasis post mortem coactum, & lentum albumque polypum in utraque cordis auricula, quorum unum nunc affervo, formatum observavimus. Sanguinem, ante mortem eductum, examinavi, eumque, calori rite expositum, observavi non citius cogi, quam solet serum, neque infra 160 gr.; ita ut, quum vena secta fuit, aut sanguinem lymphæ coagulabili caruisse, aut ejus qualitates mutatas fuisse, probabile sit.

Post ictum contusionemve sanguis subinde e vasis in membranam cellularem effunditur, aliquando ecchymosin formans, aliquando tumorem. Inter nonnullos controversia agitatur, utrum talis sanguis cogatur, nec ne: eum autem in plerisque his casibus cogi, aperiendo tales tumores probatum fuit. Observatum tamen etiam fuit, subinde his in tumoribus fluctuationem adfuisse; quæque iis continebantur, aliquamdiu post resorpta fuisse; & in

in nonnullis eorum apertis, variis etiam post casum septimanis, sanguis fluidus esse fuit observatus. Talibus in casibus sanguis probabiliter mutationem subiit, similem ei, quæ in nonnullis superiorum experimentorum observata fuit; lymphæ scilicet facultate coagulandi privata fuit, dum e vasis sanguiferis in tumorem transiit: quod phænomenon, quantumcumque notabile, congruit cum iis, quæ de lymphæ, cujus qualitates cum statu vasorum sanguiferorum mutari videntur, supra notavimus.

CAPUT V.

*Præcipuarum observationum & conclusionum,
supra memoratarum, anacephalæosis.*

Sanguinis in crassamentum & serum, intra datum tempus, separatio, eo major apparet, quo calor ejus ad calorem corporis humani propius accedat. Calor, in quo sanguis retinetur, præinde considerari meretur; ubi conclusiones ex proportionibus utriusque hujus partis elicendæ sunt.

Lætus superficiei crassamenti color aëri deberi videtur. Sanguis venosus, per pulmones transiens, similem mutationem subit, five vividior redditur, quando in arterias transit; & colorem hunc lætum denuo amittit, quando e minimis arteriis in venas transit, præsertim in homine sano. Aliquando tamen in morbis hanc mutationem non subit, sed vivido colore e venis exit.

A.D.

Sa-

Salia neutra, cum sanguine extra corpus mixta, lætum ei conciliant colorem: & magna quantitate addita impediunt, quò minus, aëri expositus, cogatur; eorumque nonnulla, lympham aqua dilutam præcipitari vel cogi, sinunt. Hinc autem concludere non licet, illa eosdem effectus productura, ubi remediorum forma adhibentur: tunc enim parva duntaxat copia propinquantur, eorumque qualitates ab organis digestionis mutari possunt, antequam cum sanguine misceantur. Quumque pleraque refrigerantia sint & sedantia; nauseam & ventriculi languorem producant, & vim systematis vasculosi minuunt. Quumque sanguinis qualitates a vasorum actione videantur dependere; hæc proinde salia, vasa afficiendo; mutationes in sanguine producere videntur, valde diversas ab iis, quas suspicari posset, qui observet, quid fiat, ubi magna eorum quantitas cum sanguine extra corpus miscetur.

Sanguis frigore non cogitur, (non dico, non in-

inspissatur; revera enim inspissatur;) sed diathesi ad coagulandum minorem vel penitus sublatam habet, si frigori diu exponatur. Quum itaque sanguis in pelvi cogitur; neque frigori hic effectus, neque defectui motus debetur: licet enim sanguis quiescens tandem coaguletur; non tamen cogetur intra illud tempus, quo in pelvi, quod in hominibus sanis septem octove minutis post venæ sectionem fit. Coagulatio itaque sanguinis in pelvi aëri probabiliter debetur.

Quum sanguis in corpore quiescit; tandem præ solo motus defectu cogetur. Hoc vero coagulum alio modo fit, ac in pelvi: intra decem enim vel quindecim minuta cogi incipit, nec intra trihorium vel quadrihorium perfecte coactus est; dum sanguis, ejusdem animalis venis eductus, aërique expositus, intra tria quatuorve minuta cogi incipiet, & intra septem octove perfecte erit coagulatus.

Es.

Efficacia, quam aër in sanguinem exferit, non illico ejus applicationem sequitur; sed ocius seriusve locum habet pro variis sanitatis gradibus: nonnunquam sanguis cogitur paucis, postquam aëri fuit expositus, minutis secundis; alias non minori, quam fesquihorii, tempore, vel forsan longiori; ut ex Experimento XIV patet.

Cruſta, ſive corium phlogiſticum, non eſt ſubſtantia noviter formata; ſed non, niſi lymphæ coagulabilis a reliquo ſanguine ſeparatâ. Hæc ſeparatio produci videtur a lymphæ attenuatione; qua fit, ut rubræ particulæ ſubito deſcendant et ſuperficiem ſanguinis pellucidam relinquant. Quum autem hæc pars pellucida ſit lymphæ coagulabilis cum ſero mixta, illa coagulatur in ſuperficie aëri contigua; quumque diathēſis ad coagulandum pariter imminuta ſit, ſanguis diu fluidus manet, et hinc tempus præbet pelliculæ in ſuperficie formatæ, quo reliquam lymphæ partem attrahat, et in ſuper-

I

per.

perficie colligat, basin placentæ in parili ratione molliorem relinquens. Corium proinde eo crassius densiusque est; quo lymphæ tenuior, ejusque ad concrescendum diathesis minor fit. Non autem certum est inflammationis indicium: nec hujus morbi causa; sed ejus tantum effectus esse videtur.

Maxime autem notanda est conclusio, ad quam nos hæc experimenta duxerunt; qualitates nimirum sanguinis dependere a statu vaforum sanguiferorum, vel hæc vi plastica in illum agere; ita ut ejus qualitates intra brevissimum tempus mutare valeant. Hujus opinionis novitatem et difficultatem intelligendi, quomodo vasa adeo insigni vi valeant, adversus hanc conclusionem objecerunt nonnulli; qui ad omnes observationes, unde elicitæ sunt, minus bene attenderunt. Hinc illas observationes paucis comprehendam.

Vasa sanguifera, fortiori debiliorive sua
actio-

actione, qualitates lymphæ mutare posse, vel intra breve tempus, repletioni variorum vasculorum in sanguinis missione impensum, primum conclusimus ex Experimento XIX; in quo primum vasculum crustam exhibebat, qua sequentia carebant. Quum jam hæc crustæ absentia in ultimis vasculis deberetur lymphæ hoc tempore inspissatæ, majorique ejus ad coagulandum diathesi; nullaque alia re obvia, unde hæc mutatio exponi posset; (diversitas enim applicati frigoris aërisve etiam tunc huic effectui producendo impar videbatur, quod porro experimento XXXI fuit probatum): eam omnino deberi mutatæ vi, qua vasa in sanguinem egerant, conclusi. Ad hanc opinionem me nota perduxit observatio; venæ sectionem nempe corpus debilitare: quumque hæc hoc in casu corium, lympham inspissando, eamque ad coagulandum proniorem reddendo, removisset; hinc eam, corpus actionemve vasorum debilitando, has mutationes lymphæ induxisse, conclusi. Consideratio eorum, quæ

in inflammationibus fiunt, meam hanc opinionem confirmavit: in iis etenim vasa sanguifera fortius agere notum est; et lympham in eadem ratione attenuatam, ejusque ad coagulandum diathesin in eadem ratione imminutam esse, supra fuit probatum.

Et hæc opinio porro confirmata fuit, considerando illa, quæ observantur; ubi animali sanguis ad mortem usque educitur, vel ubi vasa minima vi agunt: hoc etenim in casu observatum fuit, quo debilius fuerit animal, sanguinem tanto magis ad coagulandum fuisse dispositum.

Observato adeoque nexu inter lymphæ et roboris vasorum sanguiferorum mutationes, his in casibus; porro conclusi eundem forsan in aliis etiam casibus obtinere; ubi qualitates lymphæ citius mutantur, velut in Experimento XXVII; ubi in primo vase nulla crassa, in tertio vero densa erat: et hic ipse casus,

fus , diligenter examinatus , conclusionem confirmavit ; vasa enim sanguifera varia vi agere observata sunt eo ipso tempore , quo variæ lymphæ qualitates sunt observatæ. Et unica , quæ hic remansit , fuit difficultas explicandi , unde fieret , ut in primo vasculo , fecus ac fieri solet , sanguis fuerit coactus minori tempore , quam in secundo tertiove ; idque conclusi causæ cuidam febrili , ægrum afficienti vel opprimenti , attribuendum esse. Hanc conclusionem confirmavit res a Medicis agnita , pulsus nempe in morbis inflammatoriis frequenter oppressum esse , et fortiozem fieri , quo plus sanguinis evacuetur.

Ex hac conclusione ulterius progressus , conjeci , temporaria etiam roboris vasorum sanguiferorum exercitia proprietates lymphæ mutare posse : ad quam opinionem ductus sum , postquam , sanguinem crusta obductum in experimento XX , ubi magna debilitas evacuationem protinus sequebatur ; pariterque , lu-

Stationes ovium moribundarum lymphæ mutationem inducere fuisse visas, observaveram.

Hæc itaque opinio in universum congruit omnibus phænomenis, et confirmatur omnibus roboris differentiis; quæ occurrunt in variis a statu sano recessibus: ubi enim vasa fortius agunt, quam in statu sano; lymphæ in eadem ratione magis attenuatur, minusque ad coagulandum disponitur: ubi vero debilius agunt, quam in sanitate; tunc lymphæ in eadem ratione inspissatur, et ad concrescendum pronior fit. Nonne itaque probabile est, differentias; quas observamus in lymphæ spissitudine vel tenuitate, et majori minori-ve ad coagulandum diathesi; diverso vasorum sanguiferorum robori unice deberi? Tales enim roboris vasorum sanguiferorum mutationes cum mutationibus lymphæ semper connectuntur; nullamque aliam circumstantiam cum mutationibus lymphæ connexam, quæ eas ple-

plenę explicare valeat , observare possumus.

Licet autem ultro concedamus, difficillimum esse intellectu , quomodo vasa sanguifera id peragant : attamen fore spero , ut viri ingeniosi non hanc solam ob causam meam conclusionem sint rejecturi ; sed consideraturi ; quum ex numerosis experimentis sit elicita , quum omnibus phænomenis congruat , quumque ducat ad expositionem variorum , quę aliter explicari nequeunt ; eam bono fundamento niti posse , licet difficulter intelligatur. Possunt enim dari potentię in œconomia animali , de quibus nostri Philosophi adhuc ne somniarunt quidem.

Hęc observatio , qualitates sanguinis a statu vasorum dependere , non tantum multa morbose symptomata explicat ; sed etiam ducit ad ulteriorem applicationem : hinc etenim ad magis fundatas et certiores hæmorrhagiarum cu-

randarum regulas ducimur. Quum enim hæmorrhagiæ, partim orificiorum sanguinem emittentium contractione, partim sanguinis coagulatione, fisti videantur; quumque sanguinis ad coagulandum diathesis debilitando corpus augeatur, pariterque contractio orificiorum sanguinem emittentium eodem modo promoveatur: hinc constat, talia requiri remedia, quæ corpus refrigerent, et vires circulationis minuant; et, talia maxime esse efficacia, docet usus,

Pariter, quantumpote vitandam esse omnem animi agitationem corporisque motum; quia vim circulationis augent, et hinc impediunt, quo minus hæmorrhagia sistatur. Languorem contra et animi deliquium, coagulationi sanguinis orificiorumque sanguinem emittentium contractioni faventia, stimulantibus non infringenda, sed provocanda esse, docet. Quumque evacuationes corpus magis debilitent, ubi subito procedunt; apparet, cur venæ sectio
in

in hæmorrhagiis commendanda sit, et quamobrem majus orificium minori sit præferendum; ubi illum languorem deliquiumve, eamve debilem vaforum actionem, sistendæ hæmorrhagiæ adeo proficuam, producere desideramus.

Antequam finem his imponam, addere liceat, praxin hic propositam nequaquam novam vel raram esse. Quum autem nonnulli oppositas methodos laudarint, et utraque pars ad experientiam provocarit: ubi auctoritas auctoritati adeo æquivalet, junior Practicus anceps hærebit, utram secuturus sit, et præ defectu regularum, secundum quas electionem dirigat, pessimam praxin frequenter forsan adoptabit. Testetur usus vini Portuensis aliorumque adstringentium, in plerisque Angliæ partibus adeo communis.

CAPUT VI.

*De sero sanguinis, et nominatim eo,
quod lac refert.*

Serum, a crassamento separatum; dum sanguis quieti committitur in pelvi, qua receptus est; fluidum est, ut videtur, homogeneous, et pellucidum, coloris leviter flavescentis, saporis salini, (1) aqua spissius, ejusque gravitas specifica, secundum doct. JURIN, est ad aquæ, ut 1030 ad 1000 (*).

Chemice examinatum serum repertum fuit
con-

(1) *Nec mirum: etenim ex ℥j sero sanguinis gr. jss crystallorum salinarum cubicarum, (que prunis injectæ decrepitabant, instar salis marini, flammæque colorem coeruleum impertiebant,) obtinuit doct. HAMILTON. Vid. l. c. pag. 11, 12.*

(*) *Vid. Philos. Transact. N. 361.*

constare substantia mucilaginosa; quæ aqua, parvam salium neutrorum copiam continente, solvitur. Substantia feri mucilaginosa cum coagulabili sanguinis lymphæ in eo congruit, quod calore fixetur, sive cogatur: (m) sed gradus ad coagulandum serum requisitus maior est, quam qui ad fixandam lympham requiritur; lymphæ etenim cogitur calore inter 114 et 120½ gr. thermometri Fahrenheitiani medio, (vid. *Experimentum IX*;) dum serum, ut cogatur, calorem 160 gr. requirit. (vid. *Experimentum X*.)

Non autem solo caloris gradu, ad coagulationem requisito, lymphæ a mucilagine feri differt: manifestius differt in eo, quod illa aëri exposita cogatur; dum serum talem mutationem non subit.

Quum

(m) *Seri coagulationem a contenta in eodem lymphæ coagulabili soluta dependere, voluit D. BUTT.; cujus argumenta refutata vid. a doct. HAMILTON l. c. pag. 16. seqq.*

Quum serum calore coactum est, fluidum aquosum ex eo exprimi potest; quod eruditus DE SENAC *serositatis* nomine distinguit. (n)

Hæc serositas salia neutra sanguinis continet, et, licet calori aquæ ebullientis fuerit expōita; partem tamen adhuc substantiæ mucilaginosæ continet, quæ cum aqua ita combinatur, ut calore aquæ ebullientis non cogatur, donec pars aquæ ebulliendo evaporaverit; tuncque cogitur, nec muco ex aspera arteria mane per spūta ejecto multum dissimilis videtur.

Ubi pars seræ mucilaginosa calore coacta fuit, serositatem denuo solvi non poterit, nisi per putrefactionem, aut materiæ cujusdam chemicæ additionem; tuncque natura plane mutata est, speciatim in eo, quod calore cogi nequeat.

Sin

(n) *Conf.* GREGORY l. c. § 493.

Sin autem serum exponatur minori caloris gradui, quam qui ad ejus coagulationem requiritur; e. g. calori 100 gr.; sensim inspissatur in massam subfuscā, solidā: quæ massa addita aqua solvi iterum facile potest; et serum easdem, quas ante, qualitates habere videtur, nominatim; calore cogi potest. (o) Cavendum autem, ne plus aquæ addatur, quam amiserit; si enim plus addatur, quam evaporatus fuerit, ejus facultates coagulandi mutantur.

Hac proprietate, qua inspissatum per aquam iterum solubile fit, serum cum albumine ovi congruit (*): differt autem a lymp̄ha coagulabili;

quæ

(o) *Minori calori in vasis clausis aliquamdiu expositum serum, et digestum, deponit sedimentum puriforme; quod variis dotibus vero puri analogum esse, et hinc serum materiam puris continere, censet J. B. GABER tract. cit. Hæc autem opinio egregie refutatur a doct. HENDY l. c. pag. 81. seqq.; eique etiam non facile assentitur doct. HAMILTON l. c. pag. 7. seqq.*

(*) Vid. NEWMANN's *Chemistry*, Sect. IX.

quæ, etiam cum salibus neutris, (nominatim fale Glauberi vero), mixta, inspissari iterumque citra coagulationem solvi se non patitur.

Si recens serum æquali aquæ copia diluatur, tuncque calori exponatur; non cogitur calore 160 gr., velut non dilutum; neque etiam calore aquæ ebullientis, ut nuper observavi: sed jam, absque eo, ut protinus cogatur, coqui potest. Quumque aqua evaporat, pellicula in superficie formatur, quæ sensim spissior redditur, quo magis evaporatio progreditur. Hæc pellicula mucilago coagulata esse videtur; per aquam enim iterum, ut serum inspissatum, solvi nequit. (p)

Lactis

(p) *Conf. doct. HAMILTON l. c. pag. 7. Idem quoque mihi patuit: addita sero æquali aquæ quantitate, illud minori calore, nimirum inter 152 et 160 gr. medio, pelliculam contrahere observavimus; qua amota alia prodit, sensimque crassior. Calorem ad gradum aquæ ebullientis, auximus, et crassissimæ tunc pelliculæ, seu corio obductum, non autem plane coactum fuisse serum depreh-*
hen-

Lactis mucilago, five pars coagulabilis, coctione pariter a lacte separatur, pelliculæ forma, in ratione evaporationis; et lac serumque, five dilutum, five non dilutum, in eo conveniunt, quod cogantur per coagulum (*), ubi calori exponuntur: ita ut lac mucilaginosæ feri parte constare videatur, vel sit serum dilutum cum additamento olei pressi, vel substantiæ saccharinæ, loco salium neutrorum.

Licet autem lac serumque dilutum natura coagulabili convenient: alia tamen re differunt; serum scilicet dilutum modico calore

in-

hendimus; licet calor 212 gr. paullo superasset. — Ubi sero sanguinis bilis additur, non facile cogitur, (quam observationem debeo doct. J. H. RUMPEL, Practico Alcmariensi, Amico meo;) et ad plenariam coagulationem hoc in casu colorem 177 gr. thermometri Fahrenheitiani requiri, observavi.

(*) Quod est infusio ex ventriculo quarto, five abomasso vituline.

inspissari potest, absque eo ut cogatur, vel in superficie pellicula formetur: si vero lac eidem calori exponatur, non adeo perfecte inspissatur; pellicula enim in superficie formatur pro ratione evaporationis, et hæc pellicula æque perfecte coagulata videtur, ac si lac calori aquæ ebullientis fuisset expositum; non enim iterum sola aqua addita solvetur, velut serum inspissatum.

Serum promde dilutum cum lacte natura coagulabili congruit. Lympha autem coagulabilis nulla arte adhuc cognita sero perfecte similis reddi potest.

Admixta lymphæ falsa neutra eam certe eatenus ad naturam feri accedere faciunt, ut aëri exposita non cogatur; non autem adeo insigniter ejus facultatem, qua calore coaguletur, mutant: mixta enim cum sale Glauberi, (vid. *Experim. VII.*) coquebatur calore 125 gr., et, ut credo, calore 123 gr. coqueretur, si

si ei diu exponeretur; dum mera lymphæ coagulabilis inter 114 et 120½ gr. fixatur, et serum non infra 160 gr. thermometri Fahrenheitiani cogitur.

De Sero albo.

Licet serum sanguinis humani naturaliter pellucidum sit et leviter flavescat: frequenter tamen serum lactis referre; albasque subinde strias, ejus superficiei cremoris instar innatantes, habere observatur; et subinde lac albore æquare, dum coagulum solito non minus rubet. In singulis hisce casibus serum microscopio, objecta valde augenti, examinavi, illudque plurimos perexiguos globulos continere deprehendi: licet naturaliter, ubi perlucet, nulli in eo globuli observari possint; quamvis id nonnulli Auctores statuerint. Hi globuli a particulis rubris, (quæ minus proprie globuli dicuntur,) differunt magnitudine, quæ multo minor est; et forma, quæ sphaerica est, dum particulae rubrae planæ sunt. Magis cum globulis lactis congruunt. Eos cum globulis lactis muliebris con-

K

tuli,

tuli, deprehendique, globulos in lacte variæ esse magnitudinis: nonnulli enim ter quaterve cæteros magnitudine superant, et minimi, lente, cujus focus $\frac{1}{3}$ poll., conspecti, vix visibiles sunt; dum globuli feri albi magis regulares sunt, singulique magnitudine minimos globulos lacteos ferme æquant. De hoc fero albo sequentia in libris offendi. A TULPIO unum exemplum (*); a MORGAGNIO duo (**); in *Transaëtionibus Philosophicis* varia sunt notata (†); in SCHENCKII *Observationibus* duæ, ab aliis Auctoribus relatæ, observationes occurrunt (††). Idem etiam phænomenon a clar. JOANNE PRINGLIO, doct. PITCARNIO, HUNTERO, WATSONIO, BROMFIELDIO, GARTHSHORIO et FOTHERGILLIO, Northantoniensi, observatum fuisse, intellexi (q). Aliaque exempla nuper

oc-

(*) Vid. *Observ. Med. Lib. I. Cap. 58.*

(**) Vid. *Epist. XLIX. Art. 22.*

(†) N^o. 100, 442.

(††) Vid. *Obs. Lib. III.*

(q) *De fero albo etiam loquitur clar. GREGORY l. c. § 502.*

occurrerunt Amicis meis; qui mihi brevem illorum descriptionem fuerunt gratificati.

Dominus FRENSCH, pharmacopola in platea (vulgo *St. Alban-street*), mihi postquam retulerat, se asservare aliquid sanguinis, pridie missi mulieri, cujus serum lac albore æquabat, exiguum ejus ad examen quantitatem concessit, cumque ea sequentes de morbo notas. „ Maria Rider, viginti quinque ferme annos nata, robusta et hilaris, „ septem abhinc mensibus menstruis caruit. „ Sanguinem subinde vomitu, subinde per „ alvum evacuat; dolore lateris sinistri et „ ventriculi laborat; appetitus bonus est; „ quem autem cibum gustat, mox illum fastidit. De magna lassitudine et somnolentia „ conqueritur; pulsus sunt nonaginta quinque „ intra minutum. Duodecies intra hoc „ semestre spatium sanguis ei fuit missus et „ semper serum album fuit, lactis instar.”

Dominus ROBERTSON, pharmacopola in platea (vulgo *Earl-street*), mihi retulit, „ Dominum Herbertum, publicanum, trigesium „ quintum ætatis annum agentem, et obesum, „ hæmorrhagia narium, hæmorrhoidibus, et „ tam profusis sudoribus nocturnis laborasse, „ ut sæpe tempore matutino, antequam lectum linqueret, indusium mutare cogertur; sed ab aliquo tempore sudores cessasse. „ Vigesimo tertio Septembris illum narium „ hæmorrhagia fuisse correptum, quam cephalalgia per biduum triduumve fuerat prægressa. Hæmorrhagiam perseverasse, donec „ duas circiter sanguinis libras amisisset, tuncque desiisse; serumque sanguinis, lactis instar, album fuisse. Hora decima ejusdem „ noctis, hæmorrhagiam rediisse, cumque insignem sanguinis copiam amisisset: nihilominus „ congruum visum fuisse e brachio sedecim „ sanguinis uncias educere; intra quam evacuationem animo linquebatur, sed hæmorrhagia narium sistebatur. Serum ultimi hujus „ jus

„ jus sanguinis etiam albissimum fuisse. Vigesi-
 „ mo quinto, tempore matutino, illum iterum
 „ cephalalgia, et hora circiter decima narium
 „ hæmorrhagia correptum fuisse; serum vero
 „ sanguinis fero lactis non magis album appa-
 „ ruisse. Hæmorrhagiam maximam noctis
 „ partem durasse: ita ut non minus quam
 „ duas tresve libras amittere potuisse crede-
 „ retur; fero per totum hoc tempus paullu-
 „ lum albennte; tam parum autem, ut fun-
 „ dus vasis, quo continebatur, jam per illud
 „ perluceret. Hanc hæmorrhagiam iteratis
 „ vicibus rediisse usque ad tertium Octobris;
 „ quo penitus cessabat, fero sub finem pelluci-
 „ diori reddito.”

Dominus EUSTACIUS, pharmacopola in pla-
 tea (vulgo *Fermyn-street*), ad me misit phia-
 lam, continentem serum album sanguinis, cui-
 dam lanioni, suæ curæ commisso,educti. „ Hic
 „ vir,” ut mihi retulit, „ procerus erat, ro-
 „ bustus, strenuus potator, vomitu quovis

„ mane laborans, parum nutrimenti sumebat,
 „ multum sudabat; non autem emaciabatur.
 „ Sanguis ei educebatur, quum laborabat levi
 „ asthma; cui obnoxius erat, quodque
 „ semper venæ sectione levatum fuerat. Cæ-
 „ terum bene valebat, ita ut absque magno
 „ incommodo negotia perageret.”

Præter dictos casus, Amicus meus expert.
 LAMBERT, Chirurgus Novi Castri ad fluvium
 Tynam, mihi retulit „ suæ curæ ante aliquot
 „ annos commissum fuisse ægrum, vehementi
 „ coxæ dolore rheumatico laborantem; cui
 „ ter sanguinem mittere coactus fuerat: et
 „ semper ejus serum albore lac retulisse, sed
 „ coaguli colorem naturalem fuisse. Hic vir,”
 (ita porro Dominus LAMBERT) „ hilarem vi-
 „ tam agebat, crassius, sed musculosus po-
 „ tius, quam obesus, et indefessus ambula-
 „ tor erat.”

Quum primum hunc præternaturalem seri
 co-

colorem observabam, accessi ad opinionem eorum; qui eum per venæ sectionem institutam brevi post sumtum cibum, vel antequam chylus in sanguinem mutatus fuerit, explicare conati sunt. Postea vero, casus supra memoratos considerans, hanc causam esse nequaquam potuisse, observavi; quum nullus æger satis nutrimenti antea sumisset, unde hoc phænomenon enatum foret: contra, plerisque eorum appetitus erat prostratus, perparum nutrimenti sumserant, vomitionibusque erant obnoxii. Hinc alii cuidam causæ tribuendum censui: meamque opinionem stabilivit observatio, iteratis vicibus instituta in dissectionibus anseribus; quorum serum frequenter album vidi, dum chylus transparebat; licet tribus tantum quatuorve post pastum horis jugulati forent. Quumque albor in omnibus, quos examinavi, casibus, originem copię globulorum parvorum, globulos lactis, (quos oleosos esse constat,) referentium, debuerit; illos in sero humano, quando albet,

etiam oleosos esse, conclusi: mihiq̃ue in mentem revocans, me alicubi experimentum legisse, in quo butyrum e tali sero humano effluerat; nonnullos parum dilutos agitando, oleum separare vel exprimere tentavi, sed absque successu. Nonnullos porro horum globulorum ad siccitatem usque inspissavi, eosque cum naturali sanguinis humani sero, eadem methodo præparato, contuli; illosque minus tenaces, magisque inflammabiles reperi: quumque ita exsiccabantur, tantum olei exibat, ut chartam, qua continebantur, pinguem redderent. Alia hujus feri albi portio, per aliquot dies asservata, putrescebat, et putrefacta egebatur, velut lac solet, quando acorem contrahit: a lacte autem differebat eo, quod summo opere foeteret.

Quum jam his ex experimentis globuli albi oleosæ naturæ esse videantur; quumque, siquidem hi ægri parum nutrimenti sumferunt, et ex chyli in avibus pelluciditate non proba-

babile sit, alborem feri deberi chylo non assimilato, in vasis sanguiferis accumulato: hinc alij causæ eum tribuendum esse, credendum est. Quumque norimus, insignem olei copiam in tela cellulosa animalium sepositam esse, quæ data occasione resorbetur; nonne hoc notabile phænomenon, in casibus supra memoratis, tali resorptioni tribuendum fuisse, magis est probabile? (r) Quumque omnes dicti ægri symptomata plethoræ passi et sanati fuerint sive per hæmorrhagias spontaneas, sive per sanguinis missionem: nonne probabile est, oleum; quocunque scopo adhibeatur in corpore, postquam e membrana cellulari resorptum est; his in ægris citius resorptum, quam adhibitum, et hac ratione in eorum vasis sanguiferis accumulatum fuisse? Hæc conjectura confirmari videtur, considerando, in plerisque his casibus ægros obesos fuisse, duosque eorum suppress-

(r) *Ab adipe resumpto, ut videtur, serum sanguinis albere, etiam scribit* GREGORY l. c.

pressione naturalis evacuationis laborasse (*).

Ad aliam insuper conclusionem hæc observata nos ducunt: nempe ex eo, quod chylus avium, quas dissecai, non albus, sed pellucidus fuerit; quocumque post pastum tempore examinatus fuerit, sequi, pinguedinem (in his saltem animalibus) non oleosam tantum chyli vel nutrimenti partem; sed novam esse substantiam; siue novam principiorum elementorumve combinationem; quæ probabiliter in organis secretoriis membranæ adiposæ formatur. Formam olei Natura omnibus aliis ad materiam putrititiam præfert; quia putrefactioni minus

pa-

(*) Quanquam probabile videtur, feri alborem in casibus supra memoratis a chylo non enatum fuisse; tamen inde non concluderim, in C. H. chylum subinde sero colorem non impertiri. Sæpe observamus serum illorum, quibus paucis post pastum horis sanguis missus est, parum turbidum, velut serum lactis; quod chylo deberi putaverim. Sin autem feri sanguinis albor a largo passu nasceretur; nos illud sæpius observatu-
 ros, probabile est.

patet, et quia maximam nutrimenti copiam in minimo volumine continet. Hoc manifeste evicit dignus Amicus meus, et ingeniosus, dum in vivis erat, doct. STARK; qui, (variis experimentis eximis, in corporis sui, aliquamdiu vario nutrimenti generi traditi, gravitatem explorandam, institutis,) minorem axungiae, quam alius cujuslibet nutrimenti vulgaris, partem ad nutriendum suum corpus sufficere; quumque illam cum macilenta carnis parte conferret, nutrientem ejus facultatem minimum esse ut tria ad unum, observavit.

Hic aliud quid memorare juvat, quod occurrat mihi, primum in hanc rem inquirenti: nempe, quum oleum, siye pinguedinem animale, e membrana adiposa ad nutritionem corporis absorberi credamus; quumque nonnulli aegri, (quorum historias supra retuli,) cibum sumere non potuerint; resorptionem proinde hujus olei non adeo pro causa, quam pro effectu morbi, quo tunc laborabant, fuisse ha-

habendam: five, ut melius me explicem, sub quodam defectu organorum digestionis, vires Naturæ ex receptaculis olei, in membrana cellulosa positæ, recipere suppetias ex hoc fluido, tunc forsan ad usum corporis requisito. Ut hoc melius pateret; experimentum satisfacturum duxi, si serum sanguinis animalium diversis post pastum temporibus conferretur. Si enim absorptio olei tantum fieret ob alius nutrimenti defectum; vel, si serum alberet tantummodo a resorpta majori olei quantitate, ut defectus corporis suppleretur; tunc serum albere deberet in animali diutissime nutrimento carente, vel magno defectu laborante. Quumque in anseribus vulgo album hoc serum observassem, licet eorum chylus perlucere; experimentum in his instituere placuit. Duos idcirco eorum, qui valde famelici erant, sumsi; ambos avena nutriti; alterumque quatuor post pastum horis jugulavi; quo tempore partem avenæ non digestam esse noveram: sanguinem
exa-

examinans, serum album, parvisque globulis repletum, inveni; eoque sibi per breve tempus relicto, pars alba; cremoris instar, superiora petebat. Alter quadraginta octo post pastum horis jugulatus fuit; quo tempore ventriculus vacuus, serumque sanguinis plane pellucidum reperiabatur, nullo cremore ad superficiem adscendente, nullisque parvis globulis, ubi microscopio examinabatur, apparentibus. Hoc jam experimentum mihi apodicticum videbatur, et manifesto exponere, feri alborem non unice corpori, nutrimento egenti et hinc oleum e receptaculis sorbenti, tribuendum esse; siquidem hoc in casu animal, nutrimento maxime indigens, fero parum albo gaudebat: sed pinguedini citius resorptæ, quam adhibitæ, (ejus locum recenti chylo occupanti,) et hinc in vasis sanguiferis accumulata; ita ut album fero colorem impertierit. Ex eadem pariter observatione, largam pinguedinis resorptionem, et accumulationem in vasis plethoricorum supra dictorum, appetitus defici-

ficientis aliorumque morborum fuisse causam, non vero effectum, probabile videtur.

Nonne adeoque largior pinguedinis resorptio et in vasis sanguineis accumulatio, tanquam causa cujusdam plethoræ speciei, admitti potest?

Nonne pariter ad feri alborem attendere, in nonnullis ventriculi morbis conducere potest? Licet enim pinguedo sit substantia morbo parum patiens; forsan tamen subinde ita vitari potest, vel Naturæ adeo molestæ esse, ut eam ex suis receptaculis assumere, eamque adhibere vel e corpore expellere cogatur. Hoc ubi fit, ventriculi morbus et defectus appetitus plenitatem indicare; adeoque, loco remedium stomachicorum, venæ sectionem aliasque evacuationes exigere possunt.

F I N I S.